



欽定歷代職官表

11

4544
17



原
4544
17



欽定歷代職官表卷五十

總督巡撫表

督	總
	三 代
	秦
	漢
	後漢
	三國
	晉
	宋齊
	北魏
	北齊
	隋
	唐
	宋
	遼
	金
	元
	明

州牧

州牧

州牧

州牧

州牧

州牧

州牧

州牧

州牧

州牧

刺史

刺史

刺史

刺史

刺史

刺史

刺史

刺史

刺史

刺史

行臺

行臺

行臺

行臺

行臺

行臺

行臺

行臺

行臺

職官表卷五十 總督巡撫表

廣雅書局

州牧
州牧
右宿

持節刺持節刺持節刺持節刺
史
史
史
史
史
史

總管
都督
節度副
使
經略副
使

節度使
節度使
節度使
安撫使

同知都
總管
省左丞
管度使
右丞

巡撫
提督軍
務
提督軍
務
管理軍
務

巡

撫

大二十六

總督巡撫

國朝官制

總督

正二品加尙書銜從一品

直隸一人

駐保定府

江南江西一人

駐江甯府福建浙

江一人

駐福州

湖北湖南一人

駐武昌府

四川一人

駐成都府

陝西甘肅一

人

駐蘭州府

廣東廣西一人

駐肇慶府

雲南貴州一人

駐雲南府

掌綜治軍民統轄文武攷覈官吏修飭封疆直隸初設巡

撫後加總督銜後又改爲直隸總督仍管巡撫事又有三

省總督駐大名府兼轄山東河南又有宣大總督駐山西

大同府以宣化府屬之後俱省兩江總督初兼轄河南後

定爲兩江總督轄江蘇安徽江西湖廣總督初爲川湖總

督後定爲湖廣總督轄湖北湖南四川初設巡撫後裁設

總督兼管巡撫事陝甘總督初兼轄四川改轄山西後定為陝甘總督轄陝西甘肅雲貴總督初兼轄廣西後定為雲貴總督轄雲南貴州又河南初設河東總督轄河南山東後省凡總督例兼都察院右都御史銜其應否兼兵部尚書銜由吏部請

旨定奪

巡撫從二品加侍郎銜正二品直隸一人總督兼山東一人駐濟南府山西一人駐太原府河南一人駐開封府江蘇一人駐蘇州府安徽一人駐安慶府江西一人駐南昌府福建一人駐福州府浙江一人駐杭州府湖北一人駐武昌府湖南一人駐長沙府陝西一人駐西安府甘肅一人總督兼廣東一人駐廣州府廣西一人駐梧州雲南一人駐雲南府貴州一人駐陽明府

掌宣布

德意撫安齊民修明政刑興革利弊攷羣吏之治會總督以詔廢置三年大比獻賢能之書則監臨之其武科則主考試直隸初設順天巡撫正保巡撫宣府巡撫後併定為直隸巡撫江南初設廬鳳巡撫後定為安徽巡撫江西初設南贛巡撫湖北初設鄖陽巡撫後俱省湖南初設偏沅巡撫後改為湖南巡撫陝西初設延綏巡撫寧夏巡撫後俱省凡巡撫例兼都察院右副都御史銜其應否兼兵部侍郎銜由吏部請

旨定奪

歷代建置

謹案總督巡撫其官俱肇置於明代明初命京官巡撫地方有軍事則命總督軍務因事而設事已旋罷原非為一定官稱其後各省俱有之且因事增置遂為定員然總督巡撫之名已見於南北朝晉書前秦載記王二表曰總督戎機胡三省通鑑注曰總督戎機猶都督中外諸軍事也魏書李崇傳北齊書斛律金傳周書文帝紀俱有總督字陳書蕭摩訶傳吳明徹曰吾為總督必須身居其後亦謂為大都督後周書武帝紀建德二年詔皇太子贊巡撫西土五年復遣巡撫西土此倣於左傳所謂從曰撫軍者也左傳宣十二年王巡三軍拊而勉之杜豫訓拊為撫此巡撫二字所出也至唐高祖儀鳳元年遣大臣分道巡撫以宰相來恆為河南道大使許元超為

河北道大使左丞崔知悌司業鄭祖元為江南道大使後又謂之存撫于慎行穀城山房筆塵以為巡撫之名實起於此但其事任所屬由來已久蓋嘗由明而溯之自黃帝立左右大監宋書百官志作立四監監於萬國嗣是而四岳九牧八伯十二師俱為統率之職至周而二伯九采益為明備漢分天下為十三州後各置牧蓋郡縣之歸管轄自此而始魏晉而後刺史特重類以將軍持節總統諸郡非僅曩時刺舉之任迨隋開皇中廢郡為州刺史專理一郡名存職廢而總管都督節度使之號由斯著矣宋懲藩鎮之弊節度諸使之除授特以優禮勛賢或為武臣序進之階其州牧之任則自有閩帥漕憲等

官而制又一變元立行中書省明初因之後改爲十三
布政司後於布政司上又設巡撫總督則督撫者實當
行中書省之任而與古之牧伯侔矣又元於在京中書
省之外分立行省以控治諸路天下郡縣有直隸中書
省者有隸諸行省者故諸路亦號爲省明旣改布政司
則當稱某司若總督巡撫職同奉使帶部院堂二官銜
又當稱行部或行院而案牘相沿概稱爲省蓋亦沿元
之舊至

本朝以督撫專制地方以布政按察二司爲之屬以佐其
政治大小相維名實始爲允稱明又有巡按御史原於
秦之御史監郡後以與巡撫不相統屬文移亦多窒碍
定巡撫爲都御史而所用巡按御史多新進喜事之人
倚勢作威受賂不法或強與州縣之事舉錯任意爲弊
尤甚我

朝定制裁去以都御史副都御史爲督撫兼銜而事權始
一矣至若唐之節度使官級崇重其勳績較著者率加
平章事以寵之久則進兼侍中中書令而平章事之罷
政出鎮者亦多帶舊銜以行宋以宰相出判大藩均謂
之使相此則皆由一時特授而不爲常制我
朝督臣之擢任大學士者間令仍管舊任以隆委寄其督
撫所帶尙書侍郎銜之應加與否悉由部請

旨遵行規制周詳視前代之舛錯繁雜者綱維倍爲整肅謹

以歷朝異同之故先爲撮敘於此以明綱領而建置沿革之本末則次第列具左方以資攷核焉

三代

羅泌路史夏后氏紀十國而有長長有師五長而一師師五十國州十有二師州有牧牧稟命於上京孔氏謂州有十二師爲三萬人非也此不過所謂承以大夫師長者商周之連率卒正也

春秋左氏傳昔夏之方有德也貢金九牧

謹案史記黃帝立左右大監監於萬國此正如殷周時天子之老所謂分天下以爲二伯者沈約謂刺史之職卽黃帝之四監非矣堯立八伯以典諸侯立四岳以稽

大四百零七

八伯八伯卽九牧也禮記疏堯時有四伯堯之末分置八伯周禮疏案書傳云元祀巡守四岳八伯注云堯時以羲和爲六卿并掌方岳之事是爲四岳出則爲伯其後乃置八伯據此則四岳亦當賦政於外如召伯之巡行南國者歟州十二師卽十二牧此有虞之制而羅氏屬之夏后氏者蓋彌成五服禹所手定且當受命之初猶仍十二州之制其後乃制爲九牧爾

詩商頌相土烈烈鄭康成箋相土居夏后之世承契之業入爲王官之伯出長諸侯孔穎達疏王肅云相土在夏爲司馬之職掌征伐

謹案相土以諸侯之長入爲王官伯此與四岳之出主

諸侯者亦復不同其云相土爲司馬蓋文子淮南子俱有契爲堯司馬之文此云相土烈烈而箋云承契之業故本以爲說然相土以司馬而長諸侯則正如今之總督兼兵部尙書之比也

尙書盤庚邦伯師長孔安國傳國伯二伯及州牧也眾長公卿也

謹案益稷篇州十有二師鄭云師長也孔氏則云三萬人故此師亦訓眾疏順傳爲義因云眾官之長然開始卽云邦伯邦國之伯諸侯師長故爲東西二伯及九州之牧則亦不覺以師長屬邦國言之可知邦伯猶言邦君而師長則猶是虞夏時之十二師五長也

禮記王制千里之外設方伯五國以爲屬屬有長十國以爲連連有帥三十國以爲卒卒有正二百一十國以爲州州有伯

謹案王制殷制也鄭康成謂殷之州長曰伯虞夏及周皆曰牧孔穎達則謂孔安國之意不然故於盤庚之邦伯云州牧也竊疑左右之二伯伯爲定名而州長之伯例得通稱爲牧故唐有九州則爲八伯虞置十二州卽爲十二牧楚辭亦云伯昌作牧若然則竹書紀年所云王季爲殷牧師者恐亦方伯之別名而非如周禮夏官之牧師僅掌牧地者矣

周禮天官牧以地爲名

鄭康成注牧州長也

春官宗伯八命作牧

注

州之九命作伯注長諸侯為方伯

禮記曲禮九州之長曰牧明堂位九采之國鄭康成注九州之牧典貢

謹案虞有八伯殷制八州八伯故康成據周禮邦國建牧之文以為畿內不置伯有鄉遂之吏主之此當如後世畿輔府州直隸京師之比然今周禮鄉遂之職略不見有長畿內諸侯之事而秋官掌交則云九牧之維書之周官則云以倡九牧史記亦云武王徵九牧之君即鄭於左傳之五侯九伯固以為九州當有九牧則所謂畿內不置伯者疑亦就八伯言之爾

尚書康誥孟侯孔穎達疏孟長也五侯之長謂方伯使康

叔為之長者即州牧也

詩序旄丘責衛伯也鄭康成箋衛康叔之封爵稱侯今日伯者時為州伯也周之制使伯佐牧春秋傳曰五侯九伯侯為牧也

謹案周制一州一牧二伯佐之此康成據左傳為說也牧於外曰侯傳云五侯知是五牧鄭謂太公分陝而治當四侯半一侯不可分故言五侯說頗迂曲則服虔所云五侯公侯伯子男九伯九州之長者斯為當矣然二伯佐一牧則正如今各省設有巡撫而總督或兼轄數省之例也

秦

謹案秦廢侯國爲郡縣而漢因之當時郡守皆卽今之知府其上雖有監御史而秩甚卑且無專治所與今督撫不同故郡事皆直達於天子然漢郡百餘而秦止四十郡專制尤廣且如會稽一郡幾當今之爲省者三是雖爲郡守而且與今兼轄數省之總督侔矣故附識於此以見古今事勢之所由變革焉

漢

漢書百官公卿表武帝元封五年置部刺史成帝綏和元年更名牧哀帝建平二年復爲刺史元壽二年復爲牧漢書朱博列傳初何武爲大司空與丞相方進共奏言古選諸侯賢者以爲州伯書曰咨十有二牧所以廣聰明燭

幽隱也今部刺史居牧伯之位秉一州之統位下大夫而臨二千石失位次之序臣請罷刺史更置州牧以應古制奏可及博又奏請罷州牧置刺史如故奏可

謹案漢官典儀云刺史周行郡國以六條問事非條所問卽不省故刺史稱傳車其吏言從事居無常治吏不成臣而何武以爲居牧伯之位秉一州之統且謂刺史古之方伯一州表率蓋上所委任亦權勢所積至此然秩卑寵渥今之督撫固非其例故不著於表若夫州牧旣設其時乃略無可紀之人蓋二千石位任尙重而其爲牧者亦僅循資自全者爾

後漢書光武帝本紀建武十八年罷州牧置刺史

職官表卷五十一
九
謹案漢武帝初置部刺史成帝時改爲牧哀帝時復爲
刺史後又爲牧經王莽變革建武元年復置牧至此改
爲刺史而後漢書百官志云成帝更爲牧建武十八
年復爲刺史則徑似成帝改牧以後直至建武十八年
而始復爲刺史者疏矣

後漢書劉焉列傳焉遷太常時四方兵寇焉以爲刺史威
輕不能禁建議改置牧伯鎮安方夏請選重臣以居其任
焉議得用出爲監軍使者領益州牧太僕黃琬爲豫州牧
宗正劉虞爲幽州牧皆以本秩居職州任之重自此而始
謹案後漢州牧以本秩居職此正如明之總督巡撫不
定爲品秩各以京官繫銜之例也

三國

三國蜀志諸葛亮列傳領益州牧馬超傳章武元年遷驃
騎將軍領涼州牧

謹案馬超領涼州牧此當爲州牧遙領之始然馬超先
據涼州時已自稱征西將軍領并州牧矣

三國魏志文帝本紀黃初三年以荆揚江表八郡爲荊州
孫權領牧故也

南齊書州郡志吳置持節督州牧八人

三國吳志陸抗列傳孫皓卽位加鎮軍大將軍領益州牧
鳳凰二年拜大司馬荊州牧

謹案三國州牧一如漢末之制故著此數條以存其概

南齊書百官志魏晉世州牧隆重刺史任重者為使持節都督輕者為持節督起漢順帝時御史中丞馮赦討九江賊督揚徐二州軍事而何徐宋志云起魏武遣諸州將督軍王珪之職儀云起光武並非也

杜佑通典後漢光武建武初征伐四方始權置督軍御史事竟罷建安中魏武為相始遣大將軍督軍而袁紹分統諸軍為三都督魏武征孫權還又使夏侯惇督二十六軍文帝黃初三年始置都督諸州軍事或領刺史明帝太和四年司馬懿征蜀加號大都督高貴鄉公正元二年司馬昭都督中外諸軍事尋加大都督

謹案總督之名昉於古之都督南齊書以為起漢順帝

時杜佑通典以為起光武及魏武為相時然皆總理戎事為用兵而設其都督諸州或兼領刺史實起於黃初三年蓋都督以治軍刺史以治民二者兼領而職任始重亦如今之督撫其理軍事也則有各標營成稟節制其理民事也則府州縣胥歸統轄制頗相近但魏晉都督兼領刺史者止治其所駐之一州其餘則仍別置刺史所謂單車刺史俾專治民之責是兼理之中仍有分理之制故宋出廬陵王義真都督南豫豫雍司秦并六州諸軍事而所制者仍南豫州也後魏以杜超都督冀定相三州諸軍事叔孫建都督冀青等州諸軍事並見通鑑其制亦同此耳至後周改為總管而三都督之名亦相

治不廢隋始以爲散官都督之名遂微至唐復設都督後漸易爲節度使亦兼領刺史而其任益專矣蓋都督之始末如此今撮敘其概以便省覽焉

晉

司馬光資治通鑑太康元年以司隸所統郡置司州凡州十九詔曰漢末刺史內親民事外領兵馬今天下爲一刺史分職皆如漢氏故事胡三省注察舉郡縣長吏而已悉去州郡兵大郡置吏百人小郡五十人交州牧陶璜言州兵未宜約損僕射山濤亦言不宜去州郡武備然其後刺史復兼兵民之任州鎮愈重矣

謹案漢司隸校尉統三輔三河宏農七郡亦止專司察

舉初以司隸官屬制置如州儀故俗稱司州至晉乃以京輔所部定名置司州司隸校尉統之而司隸校尉卽爲州牧之任渡江以後以揚州刺史主京畿遂罷司隸不設而杜佑以爲罷司隸校尉置司州者誤也

通典晉都督諸軍爲上監諸軍次之督諸軍爲下使持節爲上持節次之假節爲下伐吳之役以賈充爲使持節假黃鉞大都督總統六師太康中都督知軍事刺史理人各用人也惠帝末乃并任非要州則單爲刺史江左以來都督諸軍尤重惟王導等權重者乃居之

謹案晉氏南遷以揚州爲京畿穀帛所資皆出焉以荆江爲重鎮甲兵所聚盡在焉三州戶口居江南之半自

非親賢重望不居是職故荊州亦稱陝西而襄陽江夏
彭城廣陵歷陽京口各置名州為藩鎮重寄當時所謂
要州蓋謂此也太康時分釐治軍治民之職不旋踵而
仍併為一蓋有不治軍之刺史而無不治民之都督江
左尤重其任惟權位最隆者乃始居之亦時會使然也

通典自魏晉以後刺史多帶將軍開府州與府各置僚屬

州官理民

別駕治中
以下是

府官理戎

長史司馬
等官是

謹案魏晉以下幕府各有僚屬自別駕治中以下名號
不一皆本州之佐官各有職掌自唐以郡守稱刺史而
治中別駕遂為郡僚其節度使屬官則有判官推官書
記支使之類至宋而閫帥漕憲又各有其屬官而唐節
度之幕職反為列郡之佐僚矣今總督巡撫既不設掾
屬而治中判官等員又各從其長以散見於他表茲並
不復著而揭其大略於此後歷代不復敘列焉

宋齊梁陳

宋書百官志刺史每州各一人

通典宋有都督諸州諸軍事舊曰監某州諸軍文帝即位
改監為都督刺史任重者為使持節都督輕者為持節皆
銅印墨綬進賢兩梁冠絳朝服而領兵者武冠自魏以來
庶姓為州而無將軍者謂之單車刺史凡單車刺史加督
進一品都督進二品不論持節假節宋與魏同

隋書百官志梁官多同宋齊之舊州刺史二千石受拜之

明日辭官廟而行

北魏

魏書官氏志高祖詔羣僚議定百官著於令都督府州諸軍事從第一品上都督三州諸軍事第二品上司州刺史第二品中都督一州諸軍事從第二品下高祖復次職令司州牧從第二品上州刺史第三品中州刺史從第三品下州刺史第四品

謹案北魏刺史固即魏晉以來州牧之任然唯都督軍事兼領者權寄特重而單州刺史秩亦稍替故即南朝官制刺史亦有在第五品者至隋而刺史僅為理一郡之官蓋積輕之勢然也

通典行臺省魏晉有之昔魏末晉文帝討諸葛誕散騎常侍裴秀尚書僕射陳泰黃門侍郎鍾會等以行臺從至晉

永嘉四年東海王越帥眾許昌以行臺自隨是也越請討石勒表

以行臺自隨及後魏謂之尚書大行臺別置官屬後魏道武帝置中正行臺

以秦王儀為尚書令以鎮之孝文帝永熙三年以宇文泰為大行臺以蘇綽為行臺度支尚書

謹案魏晉以後稱尚書省為中臺見吳諸葛恪傳亦稱為內臺

見宋書百官志其隨所管之道置於外州以行尚書事者則號

之為行臺肇端於魏晉為專征討而設不為常制至後

魏始開府置屬號為尚書大行臺於一路府州無所不

統然亦以專主軍事也至後齊始理民事隋則設官尤

眾謂之行臺省則兵農刑政盡歸統轄矣行臺專制一

方實為今制府之職其官屬必以尚書僕射侍郎為職亦猶今督撫之兼兵部尚書及侍郎也至隋以省稱遂為元行中書省之所自始焉

北齊

通典北齊司州曰牧制州為上中下三等每等又持節諸軍事

通典後周改都督諸軍事為總管又有大都督帥都督都督

馬端臨文獻通攷後周改都督諸軍事為總管武帝時以王謙為益州總管總管之名始此

謹案周明帝紀武成元年正月改都督諸州軍事為總

管自是為總管者安成公憲天水公廣尉遲綱尉遲迴即見明帝紀蔡國公廣即天水公尉遲綱邵國公會趙國公招杞國公亮衛國公直見於武帝紀俱在王謙為總管之前馬氏云王謙為總管總管之名始此非也

隋

通典隋雍州置牧餘州並置刺史亦同北齊九等之制總管刺史加使持節至開皇三年罷郡以州統縣自是刺史之名存而職廢

通典隋代三都督並以為散官煬帝改大都督為有上中下之差自上上州至下下州凡九等

隋書百官志後齊制官多循後魏行臺在今無之其官制

令僕射其尚書丞郎皆隨權制而置員焉

通典北齊行臺兼統民事自辛術始焉

武定八年辛術為東南道行臺東徐

州刺史郭志殺郡守文宣聞之敕術曰江淮初附百姓難向京師雷卿為行臺亦欲理邊民冤枉監理牧守自今以後所統十餘州地諸有犯法者刺史先啟聽報以下先理後表齊代行臺兼總民事則自術始也

謹案行臺之制後魏志無文隋志僅存其大略攷齊文

宣帝敕辛術之文則其統轄職掌均可概見矣通典又

言江左無行臺惟梁末以侯景為河南王大行臺承制

如鄧禹故事蓋梁特循襲北魏暫設此制不為常典也

後周

北周書盧辯列傳雍州牧九命戶三萬以上州刺史正八

命戶二萬以上刺史八命戶一萬以上刺史正七命戶一

萬以下刺史七命總管刺史加使校尉帥都督為旅帥都督為隊正至此則都督之名微矣

文獻通攷隋文帝以并益荆揚四州置大總管其餘總管

府置於諸州列為上中下三等加使持節煬帝悉罷之

通典大行臺隋謂之行臺省有尚書令僕射

左右

各一人

主事四人有攷功

兼吏部主簿司勳

禮部

兼祠部主客

膳部兵部

兼職方

駕部庫部刑部

兼都官司門

度支

兼倉部

金部工部屯部

兼水部虞部

侍郎各一人每臺置食貨農圃武器百工監副各置丞錄事等員蓋隨其所管之道置於外州以行尚書事

唐

新唐書百官志西都東都北都牧各一人從二品

職官表卷五十一 總督巡撫

廣雅書局

通典唐諸州復有總管亦加號使持節武德五年以洛荆并幽交五州爲大總管府七年改大總管府爲大都督府總管府爲都督府

新唐書百官志注武德初有行臺有大行臺其官有尙書省令掌管內軍民總判省事有僕射二人自左右丞以下諸司郎中略如京省

通典唐初亦置行臺貞觀以後廢

唐六典大都督府都督一人從二品長史一人從三品中都督府都督一人正三品長史一人正五品上下都督府都督一人從三品長史一人從五品上

謹案唐武德初邊要之地置總管以統軍加號使持節

蓋漢刺史之任其後改曰都督總十州者爲大都督後去大字凡都督府有刺史以下如故然大都督又兼刺史而不檢校州事其後都督加使持節則爲將諸將亦通以都督稱惟朔方猶稱大總管大都督皆親王遙領都督府之政以長史主之而節度使所治州有都督府者則領長史焉

謝維新合璧事類唐自武德至天寶以前邊防之制其軍城鎮守皆有使而道有大將一人曰大總管已而又曰大都督至太宗時行軍征討曰大總管在其本道曰大都督高宗永徽以後都督帶使持節者謂之節度使然猶未以名官景雲二年以賀拔延嗣充河西節度使自此接乎開

元天寶之間朔方隴右河東河西諸鎮皆置節度使緣邊之地凡八節度外任之重無比焉至德以後中原刺史亦循其例受節度使之號若諸州在節度使內者皆節度焉唐六典天下之節度使有八曰關中朔方節度使曰河東節度使曰河北幽州節度使曰河西節度使曰隴右節度使曰劍南節度使曰磧西節度使曰嶺南節度使

舊唐書地理志至德之後刺史皆治軍戎遂有防禦團練制置之名要衝大郡皆有節度之類或易以觀察之號東都畿汝防禦觀察使領汝州東都雷守兼之河陽三城節度使宣武軍節度使義成軍節度使忠武軍節度使天平軍節度使兗海節度使武寧軍節度使平盧軍節度使陝州節度使

潼關防禦鎮國軍使同州防禦長春宮使鳳翔節度使邠寧節度使涇原節度使朔方節度使河中節度使昭義軍節度使河東節度使大同軍防禦使魏博節度使義昌軍節度使成德軍節度使義武軍節度使幽州節度使山南西道節度使山南東道節度使荆南節度使劍南西川節度使東川節度使武昌軍節度使淮南節度使浙江西道節度使浙江東道節度使福建觀察使宣州觀察使江南西道觀察使湖南觀察使黔中觀察使嶺南東道節度使嶺南西道桂管經略觀察使邕管經略使容管經略使安南都護節度使大中咸通之間隴右歸國又析置秦州節度使涼州節度使瓜沙節度使

謹案舊志所列益據唐中葉言之至其後節度屢有增設或多賜軍號而觀察防禦亦多改爲節度使或并或析不可備書矣

新唐書百官志節度使副大使知節度事行軍司馬副使各一人同節度副使十人節度使掌總軍旅顯威賞初授具帑抹兵杖詣兵部辭見觀察使亦如之辭日賜雙旌雙節行則建節樹六纛視事之日設禮案高尺有二寸方八尺判三案節度使判宰相觀察使判節度使團練使判觀察使罷秩則交廳以節度使印自隨畱觀察使營田等印以郎官主之鑲節樓節堂以節院使主之其後有持節爲節度副大使知節事者正節度也諸王拜節度大使者皆

畱京師

謹案唐初遣大使十三人巡省天下諸州水旱則遣使有巡察安撫存撫之名後又置十道按察使各道一人後改曰十道按察採訪處置使後又曰採訪處置使後又兼黜陟使後定改曰觀察處置使攷唐之巡察使察舉州縣再周而代乃後世巡按之比其安撫存撫宣撫諸使則固今巡撫之官所由昉也若觀察使類爲節度使兼職無節度之州亦特設之所司道俗宣風綱理郡縣正卽今巡撫兩司之職蓋觀察初爲按察雖非卽明之按察使然職分相近故唐書稱其豐稔爲上攷省刑爲中攷辦稅爲下攷而王圻續通攷亦謂明設按察司

即觀察之職後遂以觀察為今守巡道之稱則指其副
貳言之唐地理志雖與節度並列要不得即指為巡撫
也又建中後行臺亦置節度諸使大率節度觀察皆兼
所治州刺史云

唐會要貞觀二年邊州別置經略使至德二載賀蘭進明
除五府經略兼節度使建中元年除元琇始不帶五府經
略

謹案經略二字見於左傳至唐始以名官其以節度兼
者則有副使永淳元年婁師德為河源軍經略副使是
也蓋唐制一道兵政屬之節度使民事屬之觀察使然
節度多兼觀察兵甲財賦民俗之事無所不領謂之都

府又各道雖有度支營田招討經略等使然亦多以節
度使兼之蓋使名雖多而主其事者每道一人而已

五季

五代史王處直列傳此中之法自將校為刺史升團練防
禦而至節度使

謹案節度使之專橫至五季而極冗濫又為特甚然遷
進亦自有其序也故著之於此

宋

柯維騏宋史新編開封府牧從二品諸府牧九州牧同
宋史職官志節度使無所掌其事務悉歸本州亦無定員
恩數與執政同以待宗室近屬外戚國婿年老久次者若

外任除殿帥始授此官亦止於一員或有功勳顯著任帥守於外及前宰執拜者尤不輕授

王明清揮塵餘話節度州有三印節度印隨本使在闕則納於有司觀察印則長吏用之州印則書付錄事掌用至暮歸於長吏凡節度在鎮兵仗之屬則觀察屬官用本使印判狀田賦之屬則觀察屬官用本使印簽狀刺史屬縣則用州印本使判狀故命帥必曰某軍節度某州管內觀察等使某州刺史必具此三者言軍則專制兵旅言管內則專總察風俗言刺史則治其州軍此祖宗損益唐制軍兵之務職守之分俾各歸其實

謹案唐節度觀察使俱帶本州刺史是以都府而兼治州事宋則以知州綜諸使務而節度觀察特爲兼判遙領之官則雖節度初除領院降麻禮數尤異已非復唐州鎮之任而此下如承宣觀察團練防禦刺史俱無職任特以爲武臣遷轉之次序而已

宋史職官志經略安撫司經略安撫使一人以直祕閣以上充掌一路兵民之事皆帥其屬而聽其獄訟頒其禁令定其賞罰稽其錢穀甲械出納之名籍

沈括夢溪筆談予爲鄜延經略使日新一廳謂之五司廳延州正廳乃都督廳治延州事五司廳治鄜延路軍事如唐之使院也五司者經略安撫總管節度觀察也唐制方鎮皆帶節度觀察處置三使今節度之職觀察歸安撫司

處置歸經略司

謹案宋制帥臣任河東陝西嶺南路職在綏御外藩則為經略安撫使兼都總管以統制軍旅河北及近地則止為安撫使蓋經略安撫使正如今總督兼巡撫之比而止為安撫使者則如今巡撫之比也又宋有制置使或兼經略使或以安撫大使兼掌經畫邊鄙軍旅之事宣撫使掌宣布威靈撫綏邊境及統護將帥督視軍旅之事亦即今總督巡撫之任然俱不常置故不著於表而附見於此又轉運使宋時稱為漕帥凡一路邊防盜賊刑訟金穀按廉之任無所不總然其初所職止催科徵賦出納綱運數事而已茲故析入布政司表內而此

亦不著云

遼

遼史百官志南面方州官某州某軍節度使

王圻續文獻通攷遼北面著帳郎君有節度使所掌非軍民事南面節度使設官甚眾遼二百餘年城郭相望田疇益闢冠以節度承以觀察防禦團練等使分以刺史縣令大略採用唐制其間宗室外戚大臣之家築城賜額謂之頭下州軍惟節度使朝廷命之後往往皆歸王府

金

金史百官志諸總管府謂府尹兼領者都總管一員正三品掌統諸城隍兵馬甲仗總判府事同知都總管一員從

四品掌通判府事○諸鎮節度使一員從三品掌鎮撫諸軍防刺總判本鎮兵馬之事兼本州管內觀察使事其觀察使所掌並同府尹

〔本志〕府尹掌宣風導俗肅清所部

謹案金制州有三等其一曰節鎮州然特節制當州別無支屬蓋自宋太平興國初詔廢各鎮支郡後遂相循不改則所謂節鎮州者名沿唐舊而實與一道置使之制異矣

元

元史百官志行中書省凡十秩從一品掌國庶務統郡縣鎮邊鄙與都督爲表裏國初有征伐之役分任軍民之事皆稱行省未有定制中統至元間始分立行中書省因事設官官不必備皆以省官出領其事其丞相皆以宰執行某處省事繫銜其後改爲某處行中書省凡錢糧兵甲屯種漕運軍國重事無不領之每省丞相一員從一品平章二員從一品右丞一員左丞一員正二品參知政事二員從二品甘肅嶺北各減一員丞相或置或不置尤慎於擇人故往往缺焉○河南江北等處行中書省○江浙等處行中書省○江西等處行中書省○湖廣等處行中書省○陝西等處行中書省○四州等處行中書省○遼陽等處行中書省○甘肅等處行中書省○嶺北等處行中書省○雲南等處行中書省○征東等處行中書省

謹案魏晉有行臺後魏謂之尙書大行臺別置官屬唐

貞觀以後廢元設行中書省中或改行尚書省所承固有自也征東行省屢置屢廢故云行中書省凡十實十一也又元至正時增置淮南江北等處行中書省後又續增福建山東廣西膠東諸處行中書省而各行省長貳亦多所添設俱一時之制故不備著

元史百官志諸路總管府上路達魯噶齊解見戶部篇總管各

一員並正三品下路秩從三品

續文獻通攷元都總管之職蓋節度使也所掌事各不同謹案元亦有經略使至正十八年命經略使問民疾苦招諭寇盜蓋即前代宣諭招撫等使之比其與宋之經略使節制諸使者異矣

明

明史職官志總督漕運兼提督軍務巡撫鳳陽等處兼管河道一員總督薊遼保定等處軍務兼理糧餉一員總管宣大山西等處軍務兼理糧餉一員總督陝西三邊軍務一員總督兩廣軍務兼理糧餉帶管鹽法兼巡撫廣東地方一員總督四川陝西河南湖廣等處軍務一員總督浙江福建江南兼制江西軍務一員總督陝西山西河南湖廣四川五省軍務一員總督鳳陽地方兼制河南湖廣軍務一員總督保定地方軍務一員總督河南湖廣軍務兼巡撫河南一員總督九江地方兼制江西湖廣軍務一員總督南直隸河南山東湖廣四川軍務一員總督河漕兼

提督軍務一員

謹案總督漕運總理河漕二職今已析入漕運總督河道總督表內然明之總督漕運兼巡撫之職而總理河漕者實亦一總督也故並著之

雷禮列卿記景泰三年命左都御史王翱總督兩廣事務自總兵以下悉聽節制然事平則歸非常設成化元年命韓雍總理軍務兼理巡撫久之雍請得文武大臣分理其事於是以陳濂撫廣東張鵬撫廣西而雍專理軍務五年御史龔成等言兩廣宜設總督兼巡撫乃起雍總督兼巡撫於梧州設總府巡撫復不設仍總於總督永爲定制謹案韓雍總督兩廣此爲專設總督之始若正統六年

征麓川以兵部尚書王驥總督軍務景泰元年討叛苗以巡撫河南副都御史王來總督湖廣貴州軍務俱在王翱爲總督之先然皆因事而設非定制也明又有經略使不專設有兵事則暫敕行事嘉靖中以易州通州昌平州爲三輔各置經略使一員以文臣領之尋罷其後主邊事者多稱經略約如總督之職茲不復著

明史職官志總理糧儲提督軍務兼巡撫應天等府一員巡撫浙江等處地方兼提督軍務一員巡撫福建地方兼提督軍務一員巡撫順天等府地方兼整飭薊州等處邊備一員巡撫保定等府提督紫荆等關兼管河道一員巡撫河南等處地方兼管河道提督軍務一員巡撫遼東地

方贊理軍務一員巡撫宣府地方贊理軍務一員巡撫大同地方贊理軍務一員巡撫延綏等處贊理軍務一員巡撫寧夏地方贊理軍務一員巡撫甘肅等處贊理軍務一員巡撫陝西地方贊理軍務一員巡撫四川等處地方兼提督軍務一員巡撫湖廣等處地方兼贊理軍務一員巡撫江西地方兼理軍務一員巡撫南贛汀韶等處地方提督軍務一員巡撫廣東地方兼贊理軍務一員巡撫廣西地方一員巡撫雲南兼建昌畢節等處地方贊理軍務兼督川貴糧餉一員巡撫貴州兼督理湖北川東等處地方提督軍務一員巡撫天津地方贊理軍務一員巡撫登萊地方贊理軍務一員巡撫安廬地方贊理軍務一員巡撫

淮揚地方贊理軍務一員巡撫承天贊理軍務一員撫治鄖陽等處地方兼提督軍務一員贊理松潘地方軍務一員

徐學聚國朝典彙永樂十九年命右都御史王彰巡撫河南時有告周府將爲不軌者上欲及其未發討之彰曰以臣之愚可不煩兵但得御史三四人隨臣以往足矣然須奉敕以臣巡撫其地乃可於是彰奉敕往巡撫

謹案王彰奉敕爲有明設巡撫之始先是洪武二十四年遣皇太子巡撫陝西蓋暫一行之非定制也宣德中以關中江南等處地大而要特命官更代巡撫不復罷去後遂與總督同爲方面大臣當時巡撫兼軍務者加

提督有總兵地方加贊理管糧餉者加總督兼理他如
整飭邊關提督邊關及撫治流民總理河道等號皆因
事特設並無定制觀明史所載其初所置巡撫如周忱
于謙等亦未嘗不得其人自中葉以後督撫多用廷推
率以營求得之又往往交結閹人爲其私黨以致擅作
威福朘剋民膏卽名掛彈章者亦多置之不問甚者反
加遷擢益無所顧忌惟事貪暴殃民而於國是邊防一
切全不爲意漫成厲階積弛已甚我

國家損益前制大小綱維措置得宜封疆大吏職任崇而
掄擇慎我

皇上勵精圖治宵旰勤求無時不以吏治民生爲念各督撫

仰膺

寵寄祇奉

德音宣力分猷小廉大法其有勤恪夙著者則攷績優敘或
特賜宮銜以示寵勵如奉職不稱自蹈愆咎則或削其冠帶
或貶其品秩仍畱原官以責後效甚或至營私黷法則
立正憲典以示懲警

慶讓予奪咸稟

睿裁無不凜肅

朝章交相感勵洵爲邳隆之極軌矣

欽定歷代職官表卷五十

職官表卷五十

總督巡撫

三

廣雅書局

欽定歷代職官表卷五十一

番禺陶紹學初校
南海羅崇齡覆校
番禺陶福祥再覆校

欽定歷代職官表卷五十一

學政表

提督學政	提督學政
三	三
秦	秦
漢	漢
後漢	後漢
三國	三國
晉	晉
<small>宋齊梁陳</small>	<small>宋齊梁陳</small>
北魏	北魏
北齊	北齊
隋	隋
唐	唐
五代	五代
宋	宋
遼	遼
金	金
元	元
明	明

提學學司
提學學備提提學御
提學學備提提學御
提學學備提提學御
提學學備提提學御
提學學備提提學御
提學學備提提學御

職官表卷五十一

學政表

廣雅書局印

學政

國朝官制

提督學政順天山東山西河南江蘇安徽江西福建浙江湖北
湖南四川廣東廣西雲南貴州各一人陝西甘肅一人以侍郎
京堂翰
林科道部屬等官由進士
出身者充各帶原銜品級奉天府一人以奉天府
府丞充福建臺灣府
一人以臺灣
道充

掌直省學校生徒攷課黜陟之事以歲科二試巡歷所屬
府州進諸生而掄文藝程品行升其賢者能者斥其不率
教者凡興革事宜皆會督撫以行之三年而代

國初各省並設督學道帶按察司僉事銜以各部郎中由進
士出身者循資擢用康熙二十三年御史張集疏請慎學

政之選

詔下九卿詹事科道會議停論俸補授之例凡順天學政缺以侍讀侍講諭德洗馬等官簡用江南浙江學政以侍讀侍講諭德洗馬中允贊善等官簡用其餘各省學道將應陞之五部郎中及參議道知府等官選擇開列請用嗣後不拘省分凡由翰林科道出者卽爲學院由部屬等官者則爲學道雍正四年定制各省督學皆改爲學院其以部屬簡任者依出身甲第各加翰林院編修檢討銜

各府廳等儒學教授正七品直隸十人山東十人山西十人河南九人江蘇八人安徽八人江西十有三人福建十人浙江十有一人湖北九人湖南九人陝甘十有六人四川十有二人廣東

十人廣西十有一人雲南十有五人貴州十有三人各州儒學

學正八品直隸二十有二人山東十有一人山西十有六人河

南十人江蘇六人安徽九人江西二人福建二人浙江一人湖

北七人湖南七人陝甘二十有三人四川十有八人廣東十人

廣西十有六人雲南三十人貴州十有四人各廳縣儒學教諭

正八品直隸一百十有五人山東九十有一人山西六十有一人

河南九十有八人江蘇四十有六人安徽四十有八人江西七

十有五人福建五十有八人浙江七十有六人湖北五十有四

人湖南五十有七人陝甘六十有四人四川八十有六人廣東

七十有三人廣西四十有二人雲南三十有二人貴州三十有

三人各府廳州縣等儒學訓導從八品直隸一百四十人山東一

百十人山西九十有五人河南一百五人江蘇五十有九人安徽六十有四人江西九十有一人福建七十有二人浙江八十有八人湖北七十人湖南七十有七人陝甘一百三十有四人四川一百二十人廣東九十有四人廣西六十有三人雲南七十有三人貴州六十八

各掌其學校生徒訓迪之事凡儒學官除江蘇安徽兩省通用外其餘例用本省人惟同府州者避不用初康熙三年裁各府州訓導又大縣裁訓導小縣裁教諭十五年均復設其後縣有析置者則訓導每移置所析縣而裁省之縣亦間存鄉學教諭或訓導焉

歷代建置

三代

禮記王制天子命之教然後爲學小學在公宮南之左大學在郊

詩小序泮水頌僖公能修泮宮也

謹案自契爲司徒則教民始有專官周以司徒掌邦教而其制益詳其時鄉大夫受教法於司徒頒之鄉吏使各以教其所治而諸侯之國亦講學行禮以歲貢其太學之秀者天子試之射宮視其賢否以行慶讓之法然則古者長民之官卽教民之官而無俟別設其職茲故略著周時諸侯之學以志緣起而歷代之沿革則自漢以下乃始得而備論之云

秦未置

漢

漢書平帝本紀元始三年立學官郡國曰學縣道邑侯國曰校校學置經師一人鄉曰庠聚曰序庠序置孝經師一人

謹案漢循吏傳謂文翁修起學官於成都市中招下縣子弟以為學官弟子至武帝時乃令天下郡國皆立學校官實自文翁始董仲舒傳亦云復興學校之官自仲舒發之然則郡縣學校設官自武帝始矣元始中於校學置經師於庠序置孝經師云經師則統諸經為名云孝經師乃止業一經者蓋郡國設太學故置經師一人

鄉聚小學故僅置孝經師攷隸釋載學師宋恩等題名有孝掾與易掾尚書掾詩掾春秋掾並列則孝掾乃孝經掾也其設官差等當為今府州縣學諸職所託始矣漢書韓延壽列傳令文學校官諸生皮弁執俎豆

王尊列傳尊師郡文學官

顏師古注郡有文學官而尊事之以為師也

謹案漢梅福雋不疑蓋寬饒諸葛豐張禹列傳皆云為郡文學而匡衡以太常掌故調補平原文學後漢鄧禹亦云臣少嘗學問可郡文學蓋當時太常以博學名官郡學則以文學名官隸釋載劉熊碑陰題名有故郡文學李義亦其證也

漢書儒林列傳元帝好儒郡國置五經百石卒史

謹案郡國學官有掾有史卽五經百石卒史也鄭崇爲郡文學史後漢楊倫爲郡文學掾皆卽其職張納碑陰題名文學主事掾史各一人文學掾二人史一人後漢書言百石皆由長自除不得比於下士然五經百石史各典一經與經師相羽翼視他曹小吏有別文翁選郡縣小吏開敏有材者張叔等十餘人遣詣京師受業博士知學官之中雖小吏可與博士之業然則郡國之五經百石史當近於是漢郡縣學校官吏不詳於史而金石遺文尙可補史志之闕故略著之

後漢書劉寬列傳典歷三郡每行縣輒引學官祭酒及處士諸生執經對講

謹案隸釋載文翁學生題名碑有文學祭酒此學官祭酒其卽文學祭酒歟中部碑又有校官祭酒任延爲武威太守造立校官校官卽學官則校官祭酒當亦卽文學祭酒矣

常璩華陽國志文翁立文學精舍永初後太守陳畱高昞更增造二石室州奪郡文學爲州學郡更起文學謹案漢以州統郡州有文學而郡又別設之則今制府各有儒學而附府縣亦有儒學者實昉諸此也

三國

三國蜀志尹默列傳先主定益州領牧以爲勸學從事譙周列傳丞相亮領益州牧命周爲勸學從事大將軍蔣琬

領刺史徒為典學從事總州之學者

謹案文翁學生題名碑有典學從事蜀設典學從事固漢法也勸學從事當在典學從事之下亦如今學政之下有教授學正等官也

三國魏志高柔列傳太祖撥亂之際並使郡縣立教學之官管輅列傳清河太守華表召為文學掾冀州刺史裴徽辟為文學從事

王應麟玉海魏樂祥為河東文學祭酒

謹案管輅以文學掾辟為文學從事則文學從事當即勸學從事之類也

三國吳志孫瑜列傳領丹陽太守立學官臨饗講肄

晉

晉書熊遠列傳郡辟為文學掾孟嘉列傳庾亮領江州辟部廬陵從事轉勸學從事

宋書禮志晉征西將軍庾亮在武昌開置學官教曰今王道隆盛便處分安學校處所籌量起立講舍參佐大將子弟悉令入學吾家子弟亦令受業四府博學識義通涉文學經綸者建儒林祭酒使班同三署皆妙選邦彥以充此舉近臨川臨賀二郡並求修復學校可下聽之

謹案儒林祭酒當即漢之所謂文學祭酒學官祭酒校官祭酒也庾亮欲敦明庠序旋即廢罷其後尚書謝石又請班下州郡普修學校亦未見施行則所謂久廢之

典卒難興復者江左之所以不振也

宋齊梁陳

杜佑通典宋職掌人孝經師

謹案宋有孝經師蓋仍襲漢制然不在九品之數而與門亭長等並稱職掌人則其官微矣

南齊書豫章王嶷列傳為南蠻校尉荆湘二州刺史於南蠻園東南開館立學置儒林參軍一人文學祭酒一人勸學從事二人王秀之列傳豫章王於荊州立學以秀之領儒林祭酒

謹案儒林參軍在文學祭酒之上疑如前代典學從事之比也

玉海梁元帝為荊州起州學置儒林參軍勸學從事

謹案梁天監四年分遣博士祭酒到州郡立學而官品十八班內有揚南徐州文學從事南兖州文學從事荆河司益廣青五州文學從事北徐北兗梁交南梁五州文學從事越桂寧霍四州文學從事此皆文學之設於州者以漢制準之則州之文學當如郡之文學其名以從事或亦即勸學從事之類歟

北魏

魏書高允列傳請制大郡立博士二人助教四人學生一百人次郡立博士二人助教二人學生八十人中郡立博士一人助教二人學生六十人下郡立博士一人助教一

職官表卷五十一
九
人學生四十人

謹案魏天安初詔立鄉學郡置博士二人助教二人其後從高允所請乃更其制又魏官品從八品有司州文學據諸郡皆設博士助教而於司州仍襲漢文學之名則司州文學當如今京府教授也

北齊

北齊書儒林列傳齊制諸郡並立學置博士助教

隋書房暉遠列傳齊南陽王綽為定州刺史詔為博士

後周

周書薛慎列傳太祖於行臺省置學取丞郎及府佐德行明敏者充生以慎為學師以知諸生課業

隋

謹案周於行臺省置學其學生以丞郎及府佐充與歷代州郡立學之制不同然亦一時之創制也附著於此

隋書柳昂列傳隋文帝受禪昂見天下無事請勸學行禮自是天下州縣皆置博士習禮焉

謹案隋高祖仁壽元年廢天下學迨煬帝復開庠序而郡縣之學盛於開皇初其時之為學官者如孔穎達為河南郡博士潘徽為揚州博士劉焯為冀州博士皆其可紀者也

唐

唐六典京兆河南太原府經學博士一人從八品上助教

二人學生八十人大都督府經學博士一人從八品上助教二人學生六十人中都督府經學博士一人從八品下助教二人學生六十人下都督府經學博士一人從八品下助教一人學生五十人上州經學博士一人從八品下助教二人學生六十人中州經學博士一人正九品上助教一人學生五十人下州經學博士一人正九品下助教一人學生四十人萬年長安河南洛陽奉先太原晉陽博士一人助教一人學生五十人京兆河南太原諸縣諸州上縣博士一人助教一人學生四十人諸州中縣博士一人助教一人學生二十五人諸州中下縣諸州下縣博士一人助教一人學生二十八博士專以經術教授諸生

新唐書百官志西都東都北都鳳翔成都河中江陵興元興德府文學一人從八品上掌以五經授諸生縣則州補州則授於吏部武德初置經學博士助教學生德宗即位改博士曰文學元和六年廢中州下州文學京兆等三府助教二人學生八十人大都督上州各助教一人中都督府學生五十人下府下州各四十人

謹案漢郡國有文學北魏以下則為博士助教之官唐德宗改博士曰文學蓋復其舊號故新志與六典所稱各異

新唐書百官志大都督府文學一人正八品下中都督府文學一人從八品上下都督府文學一人從八品下上州

文學一人從八品下凡縣皆有經學博士助教各一人京縣學生五十人畿縣四十人中縣以下各二十五人

謹案唐制凡學生隨府州之上中下為多少而文學官品亦異蓋學生多則訓教廣少則殺焉故文學官亦因之為高下也

新唐書選舉志縣學生州縣長官補長史主焉每歲仲冬州縣館監舉其成者送至尚書省

謹案唐州縣學生以長史主之蓋長史為都督刺史之佐實領州縣之事故州縣學生並屬焉其不言諸文學者文學惟司訓教不關選補也然則唐之府州長史有如明提學副使僉事之比而亦今京府府丞充提督學

政之比也

五季

馬端臨文獻通攷後唐天成三年宰臣兼判國子祭酒崔協奏請頒下諸道州府各置官學

宋

宋史職官志提舉學事司掌一路州縣學政歲巡所部以察師儒之優劣生員之勤惰而專刺舉之事崇寧二年置宣和三年罷

謹案自漢武帝時天下郡國皆立學校官嗣後頗相沿襲然多於郡邑設之未嘗於一路統設監司總郡邑諸學也唐李栖筠等之議請於十道大郡置太學館遺博

士出外兼領郡官以教生徒與明制各省之設提學副使僉事者意已相近然其議不行宋元符二年初令諸州行三舍法諸路選監司一員提舉學校守貳董幹其事則提舉學事司之所自始矣宋選舉志謂貢士至太學試中上等或預升舍人多其本貫監司太守推賞有差所謂監司即提舉學校官太守即董幹其事者也文獻通攷載崇寧五年貢士至辟雖不如令者凡三十有八人皆遣歸而提學官皆罰金蓋當時以貢士優劣定提學賞罰之格如令則賞不如令則罰也選舉志謂諸路選監司提舉學校在元符二年而職官志乃謂崇寧二年置提舉學事司或元符二年始以監司提舉至崇

寧二年乃專設提舉學事司歟又攷紹興十八年國子監參酌諸州軍如未差教授處即令本路提舉司於本州有出身官選差一員兼領二十一年大理寺主簿丁仲京奏贍學田多爲勢家侵佃望令提舉學官覺察既而戶部請令提舉司置籍勾管慶元二年吏部尙書葉翥請令太學及州軍學各以月試合格前三名程文上御史臺攷察其有舊習不改則坐學官提學司之罪然則提舉學事司雖罷於宣和三年而其後仍復設之今制於各省設提督學政蓋防乎此矣

王明清揮麈前錄政和中詔天下州縣官皆帶提舉管勾學事時姚麟以節度使守蔡州建言乞免繫階朝廷許之

靖康初除去紹興中復增但改庶官爲主管尋降旨武臣帥守並免入銜

謹案州縣官皆帶提舉管勾學事蓋卽所謂守貳董幹其事者也其後諸縣學委知通於令佐內選有出身官一員兼領教導職事若州縣官俱無出身只令本學長諭專主教導卻令知州縣令覺察點檢此武臣帥守所由俱免以提舉管勾學事繫銜歟

宋史職官志教授景祐四年詔藩鎮始立學他州勿聽慶厯四年詔諸路州軍監各令立學學者二百人以上許更置縣學自是州郡無不有學始置教授以經術行義訓導諸生掌其課試之事而糾正不如規者委運司及長史於

幕職州縣內薦或本處舉人有德藝者充熙寧六年詔諸路學官委中書門下選差至是始命於朝廷元豐元年州府學官共五十三員諸路惟大郡有之軍監未盡置元祐元年詔齊廬宿常等州各置教授一員自是列郡各置教官建炎三年教授並罷紹興三年復置四十二州十二年詔無教授官州軍令吏部申尙書省選差二十六年詔並不許兼他職令提舉司常切遵守若試教官則始於元豐添差教授則始於政和

謹案宋設教授爲今之教授所自始其以本處舉人充亦爲今學官皆用本省人所自始宋初有石鼓廬阜嶽麓睢陽四書院又有嵩陽書院茅山書院各有師徒錫

之經傳然未建州學乾興元年兗州守臣孫奭私建學舍聚生徒乞請太學助教楊光輔充本州講書從之此爲州鎮立學之始其後令州若縣皆立學本道使者選部屬官爲教授員不足取於鄉里宿學有道業者神宗初令中書採訪逐路有經術行誼者權教授並選薦京朝官蓋學官選薦之重如此其後又詔諸州學官赴學士院試而後選又有侍從臺諫國子長貳歲舉之制則今制學官由吏部銓選由巡撫攷試與舉而兼試之制略同

李壽國史長編崇寧二年五月詔廣州漳州各添置教授一員六月詔縣學生不及二十人處許依州學例并附近

大縣一處教養給諸州州學印三年六月江東路提舉學事司言諸州皆已置學惟廣德軍附宣州今學者漸多乞自置學從之仍詔諸路州軍未曾置學處並置學

謹案宋元豐初大興學校而天下之教授止五十三員至崇寧中而天下無不置學之州軍今之各府州縣盡設學官昉乎此也若縣學生不及二十人處許附大縣一處教養則正如今之衛學鄉學繫於附近縣學爾

玉海大中祥符元年十一月幸曲阜縣謁文宣廟二年二月詔就廟立學舍

謹案魏黃初二年令魯郡修孔子廟又於其外廣爲室屋以居學者此爲就廟立學之始而教職官舍今亦卽

附至聖廟蓋卽以所業之地規其居也又宋慶厯二年詔兩制舉官爲武學教授三年置武學於武成王廟以太常丞阮逸爲教授慶元五年詔諸州學置武士齋宮按武藝今制學政歲試校士兼及文武生員童生而習武之生童未嘗別立武教職以統之則文武並轄勝於一切紛紛之制矣

遼

王圻續文獻通攷遼南面黃龍府學官曰博士曰助教興中府學設官同縣亦設學有博士助教

遼史大公鼎列傳改良鄉令建孔子廟學部民服化

謹案遼以兵經略方內禮文之事視古多闕故略摭見

於傳者以存其概

金

金史百官志諸府教授一員諸節鎮教授一員諸防禦州教授一員

謹案金於大興府及東京北京上京河東東西路山東東西路等處並設女直教授一員其所職當與諸府教授不同附著於此

金史選舉志府學大定十六年置凡十七處共千人以嘗與廷試及宗室皇家袒免以上親并得解舉人爲之後增州學遂加以五品以上官曾任隨朝六品官之兄弟子孫餘官之兄弟子孫經府薦者同境內舉人試補三之一凡

試補學生以提舉學校學官主之

謹案宋制學生以州縣官選補長史主之而金則以提舉學校及學官主之蓋既設提舉學校專官同於監司之任自不得僅以州縣選補又別以長史主之也今制學政歲科二試取士此正如所云補試學生以提舉學校官主之者然其試也必由縣府若州試乃與院試則亦兼參宋代州縣選補之法焉

元

元史百官志儒學提舉司秩從五品各處行省所署之地皆置一司統諸路府州縣學校祭祀教養錢糧之事及攷校進呈著述文字每司提舉一員從五品副提舉一員從

七品吏目一員司吏二人

謹案元於江浙湖廣江西三行省置蒙古提舉學校官提舉一員從五品同提舉一員從七品蓋亦猶金大興府等處之設女直教授也

元史選舉志至元二十八年令江南諸路學及各縣學內設立小學選老成之士教之其他先儒過化之地名賢經行之所與好事之家出錢粟贍學者並立為書院凡師儒之命於朝廷者曰教授路府上中州置之命於禮部及行省及宣慰司者曰學正山長學錄教諭路州縣及書院置之路設教授學正學錄各一員散府上中州設教授一員下州設學正一員縣設教諭一員書院設山長一員凡路

府州書院設直學以掌錢穀

謹案宋於州縣學官俱設教授至元又增設學正教諭則今制於府設教授州設學正縣設教諭實始諸此第宋元以前州有上中下之分元於下州設學正而上州中州則設教授以進擬於府與今制稍異也

陶宗儀輟耕錄凡學官朔望講說所屬上司官或省憲官至自教授學官暨學賓齋諭等皆講說一書錢伯全作訓導時行刑官至講欽哉欽哉惟刑之恤哉講畢稱賞不已謹案漢何武為刺史行部必先即學官見諸生試其誦論問以得失如今制凡學政及各上司官莅學則學官弟子每講說一書其制實防乎此且據輟耕錄所載則

元之學官已有所謂訓導者而元史百官志無其文疏漏甚矣

明

明史職官志都察院十三道監察御史提督學校兩京各一人萬厯末南京增設一人○按察司副使僉事提督學道十三布政司各一員惟湖廣二員

謹案明制兩京督學以御史蓋兩京不設按察司故以御史督學兼重其選所以尊京畿則今制各省學政多以京官簡充實本諸此

明史職官志儒學府教授一人從九品訓導四人州學正一

人訓導三人縣教諭一人訓導二人教授學正教諭掌教

誨所屬生員訓導佐之凡生員廩膳增廣府學四十人州學三十人縣學二十人附學生無定數儒學官月課士子之藝業而獎勵之凡學政遵臥碑咸聽於提學憲臣提調府聽於府州聽於州縣聽於縣其殿最視鄉舉之有無多寡明初置儒學提舉司洪武二年詔天下府州縣皆立學十三年改各州學正為未入流先是從九品二十四年定儒學訓導位雜職上三十一年詔天下學官改授秀郡州縣正統元年始設提督學校官又有都司儒學行都司儒學衛儒學以教武臣子弟俱設教授一人訓導二人河東又設都轉運司儒學制如府其後宣慰安撫等土官俱設儒學謹案明制生員入學初由巡撫御史布按兩司及府州

縣官正統元年始特設提學官景泰元年罷天順六年復設各賜敕諭十六條俾奉行之直省既設提學有所轄太廣及地最僻遠歲行巡所不能及者乃酌其宜口外及各都司衛所土官以屬分巡道員直隸廬鳳淮陽滁徐和以屬江北巡按湖廣衡永郴以屬湖南道辰靖以屬辰沅道廣東瓊州以屬海南道甘肅衛所以屬巡按御史亦皆專敕行事萬厯四十一年南直隸分上下江湖廣分南北始各增提學一員提學之職專督學校不理刑名所受詞訟重者送按察司輕者發有司直隸則轉送巡按御史督撫巡按及布按二司亦不許侵提學職事也又明初優禮師儒教官或擢給事御史然鉗

東亦甚謹初教官攷滿兼覈其歲貢生員之數後以歲貢為學校常例乃定學官攷課法專以科舉為殿最九年任滿核其中式舉人府九人州六人縣三人者為最其教官又攷通經即與陞遷舉人少者為平等即攷通經亦不遷舉人至少及全無者為殿又攷不通經則黜降生員之數初定府學四十人州縣以次減其十未幾即命增廣不拘額數宣德中定增廣之額土官子弟許入附近儒學無定額諸生上者中式次者廩生年久充貢或選拔為貢生提舉官歲試校文之外令教官舉諸生行優劣者一二人賞黜之以為勸懲此其大較也然明之提學官既帶按察司銜即不得不少屈於督撫往往阿附遷就不能自舉其職而為學官者又多取諸歲貢之士大率闕冗疲老無以為諸生表率以致鼓篋之徒把持上官信嚙百姓聚黨成羣投牒呼譟論者徒歸咎於養士之不精而不原於制法之未善則亦非為通論也我

朝右文重道超軼前古各省學政俱以京官簡任我皇上復加意整飭凡學政受事必

訓諭諄至期以端士習而正文體至若銓授教職必令督撫親加攷驗列等第以別用舍而學政巡歷所至又攷其文藝師範黜其不稱職者記曰師道立而善人多又非獨

各省兵備水利屯田等道

大夫監

觀察使
團練使
防禦使
提舉茶鹽使
馬二白
渠諸司

屯田使
團練使
儲驛使
屯田使
利撫民

等事
派管兵
備巡海
清軍
練等事

司道

國朝官制

承宣布政使司布政使

從二品

直隸山東山西河南江寧蘇州安

徽江西福建浙江湖北湖南陝西甘肅四川廣東廣西雲南貴州各一人

布政使掌一省之政司錢穀之出納

朝廷有德澤禁令承流宣布以達於有司闔省僚屬以時頒其祿俸滿秩廉其稱職不稱職報督撫以達於吏部十年會戶版均稅役登民數田數以達於戶部凡有大興革及諸政務會議經畫定報於督撫而行之

國初每省設承宣布政使司置左右布政使各一人順治十

八年分江南布政使司為江蘇安徽各二人康熙二年分陝西布政使司為陝西甘肅各二人三年分湖廣布政使司為湖北湖南各二人六年去左右繫銜每省止設布政使一人初以直隸近在畿甸不設藩司以口北守道兼山西布政司銜康熙八年增設直隸守道一人總司錢穀雍正二年改為布政使乾隆二十五年分江蘇布政使為江蘇安徽各一人

布政使司經歷從六品直隸山東山西河南江蘇安徽江西福建

浙江湖北陝西四川廣東廣西雲南貴州各一人理問從六品直

隸江寧蘇州江西浙江湖南陝西雲南各一人都事從七品江南

福建各一人照磨從八品山西福建浙江湖北甘肅四川廣東各

一人庫大使正八品直隸山東山西河南江寧蘇州安徽江西福

建浙江湖北湖南陝西甘肅四川廣東廣西雲南貴州各一人

倉大使從九品安徽一人

經歷掌出納文書理問掌勘核刑名都事掌受發文移照磨掌照刷卷宗庫大使掌司庫藏之出入倉大使掌檢稽倉庾經歷等官員額俱康熙六年定直隸員額雍正二年定理問初各布政使俱設惟貴州不置康熙三十八年省福建廣東廣西四川各一人雍正二年又省山東山西河南安徽湖北甘肅各一人乾隆二十五年增設江寧一人都事初置福建河南江西山西布政司各一人康熙三十八年省江西山西二人照磨初各布政司俱置康熙三十

八年省山東河南廣西雲南江蘇安徽江西陝西湖南貴州各一人庫大使初置山西三人江南湖廣各二人浙江江西福建山東河南陝西廣東雲南貴州各一人後省山西二人乾隆元年又增置直隸甘肅四川各一人二十五年增設江寧一人又初置有各布政司檢校庫副使寶源局大使副使等官後俱省

提刑按察使司按察使正三品直隸山東山西河南江蘇安徽江西福建浙江湖北湖南陝西甘肅四川廣東廣西雲南貴州各一人

按察使掌全省刑名按劾之事振揚風紀澄清吏治大者與藩司會議以聽於部院理合省之驛傳三年大比為監

試官大計為攷察官秋審為主稿官與布政司稱兩司員額順治間定河南陝西湖廣分省添設與布政使同初直隸不設臬司以大名巡道兼河道按察使銜通永天津道俱兼山東按察使銜霸昌井陘道俱兼山西按察使銜康熙八年增設直隸巡道一人總理刑名三十八年省井陘道雍正二年改直隸巡道為按察使

按察使司經歷正七品直隸山東山西河南江蘇江西福建浙江湖北陝西四川廣東廣西雲南各一人知事正八品江西一人照磨正九品安徽福建浙江湖南甘肅廣東貴州各一人司獄從九品直隸山東山西河南江蘇安徽江西福建浙江湖北湖南陝西四川廣東廣西雲南貴州各一人

經歷照磨職掌與布政司屬同知事掌勘察刑名司獄掌
 管理繫囚經歷等官員額俱康熙六年定直隸員額雍正
 二年定知事初設江西福建山西廣東廣西各一人康熙
 三十八年裁福建山西廣東廣西各一人照磨初每省一
 人康熙三十八年裁山東河南江西廣西雲南江蘇陝西
 山西湖北四川各一人又初置有各省檢校後俱省

各道初制參政道從三品副使道正四品參議道從四品僉直
 事道正五品乾隆十八年省去兼銜俱改為正四品

隸口北道霸昌道通永道天津道清河道大名道熱河道各一
 人山東督糧道濟東泰武臨道登萊青道兗沂曹道各一人山
 西冀寧道河東道雁平道歸綏道各一人河南開歸陳許道糧
 鹽道南汝光道河北道河陝汝道各一人江南江安糧儲道蘇

松糧儲道常鎮通道松太道鹽巡道鳳廬道寧池太廣道各一
 人浙江督糧道鹽法道寧紹台道溫處道杭嘉湖道金衢嚴道
 各一人江西督糧道鹽法道廣饒九南道吉南贛寧道各一人
 福建督糧道鹽法道興泉永道延建邵道汀漳龍道臺灣道各
 一人湖北督糧道鹽法道荆宜施道安襄鄖道武漢黃德道各
 一人湖南糧儲道鹽法長寶道衡永郴桂道岳常澧道辰永沅
 靖道各一人陝西督糧道鹽法道潼商道漢興道延榆綏道各
 一人甘肅甘涼道平慶道鞏秦階道蘭州道寧夏道西寧道安
 肅道鎮迪道各一人四川鹽茶馬道松茂道川東道建昌道永
 寧道川北道各一人廣東督糧道惠潮嘉道肇羅道雷瓊道南
 韶連道高廉道各一人廣西蒼梧道左江道右江道各一人雲

南糧儲道鹽法道迤西道迤東道迤南道各一人貴州督糧道
貴西道古州道各一人

分守分巡及糧儲鹽法各道或兼兵備或兼河務或兼水利或兼學政或兼茶馬屯田或以糧鹽兼分巡之事皆掌佐藩臬覈官吏課農桑興賢能礪風俗簡軍實固封守以倡所屬而廉察其政治

國初設布政司左右參政參議曰守道設按察使副使僉事曰巡道有通轄全省者有分轄三四府州者各以職事設立於要地後因時裁設銜額無定均視其陞補之本職為差如由京堂等官補授者為參政道由掌印給事中知府補授者為副使道由科道補授者為參議道由郎中員外

主事同知補授者為僉事道守巡皆同乾隆十八年省去參政參議副使僉事等銜定為守巡各道職秩彌昭畫一焉

各道庫大使從九品直隸山東江西福建浙江湖北湖南雲南各一人江蘇二人倉大使未入流陝西廣東各一人

庫倉大使掌各道之庫藏倉庾皆因所掌之事先後設定員額

歷代建置

謹案監司分職實為方面之重任劉昭續漢書註引晉太康詔曰二千石專治民之重監司清峻於上吳曾能改齋漫錄引晉徐邈與范甯書曰擇公方之人以為監

司謂監司之名始此蓋皆指當時刺史言之至於藩臬分職攷之於古惟唐轉運觀察諸使爲之權輿至宋之轉運使掌經度一路財賦吏蠹民瘼悉條以上達爲今布政使之所由始提點刑獄掌察所部獄訟平其曲直及專舉刺官吏之事爲今按察使之所由始溯而上之漢代專重郡守其臨郡國之上者惟十三部刺史蓋郡守地大而權重有事得以專達秩至二千石如今之二三品治效著聞則璽書勸勵增秩賜金其高第卽入爲卿相故朝廷不復多設官以臨制之唯刺史以下大夫而臨二千石職專舉刺八月行部錄囚徒攷殿最歲盡入奏所薦得爲九卿所效輒從黜罷是刺史一官固兼

有今日司道之任也魏晉以後刺史益重其兼都督帶持節者已如今日之督撫卽單車刺史專制一方亦別無大府以臨其上然綜理郡縣而受其成爲守令風教之所自出則其司存有由來也隋始罷州惟立總管唐則有採訪按察觀察處置之名轉運租庸度支營田之職兩司分理實啟其概而諸道分巡防禦團練又爲守巡兵備之所託始蓋監司之設至是漸廣宋裁藩鎮之權而帥漕憲倉之職始重元立行省藩司之職實寓於參知政事復設肅政廉訪以重提刑之寄明初亦設行省旋改參知政事爲承宣布政使其提刑按察使則卽宋提點元廉訪之舊職而參政參議副使僉事諸職備

耶官表卷五十一
九
焉惟是兩司上承督撫而復參之以巡按雖做漢氏刺
史之遺意而統泄爲太煩下轄諸道而均繫以藩臬之
銜亦未足以專其表率也我

朝監古定制兩司諸道各專其職以倡率府縣而歸其成
於督撫綱紀肅清酌繁簡而立其中有非前古所可企
及者今歷攷前史自唐之轉運使觀察使始列於表其
前此者如成周之方伯秦之監御史漢以後之刺史職
掌相近而品秩較易則並隨條疏證於後以明其同異
分合之故而不復列於表焉

三代

周禮春官大宗伯注鄭司農云長諸侯爲方伯

謹案布政使稱曰藩司亦稱方伯攷周申侯爲宣王方
伯式是南邦而蕃宣咏於周雅蕃卽藩司也藩司肇名
蓋由於此其以承宣繫銜亦本於此惟古之方伯實長
諸侯之國卽以侯伯之賢者爲之非今藩司所可比擬
而統臨諸國督率全省與今藩司之表率各府州縣約
略相等故敘列其概以稽稱名之故也

尙書康誥外事汝陳時臬司師茲殷罰有倫

謹案按察使稱爲臬司臬法也其語始見於康誥攷呂
祖謙尙書精義云外事衛國之事康叔爲周司寇王廟
之官職任內事故以衛國爲外事又攷孔穎達尙書疏
云孟侯五侯之長謂方伯康叔爲之卽州牧也是康叔

以列侯爲方伯而康誥一篇於明罰敕法三致意焉蓋實今日方面提刑之所託始而臬司所由稱也厥後呂刑之詰四方一則曰四方司政典獄非爾惟作天牧一則曰官伯族姓其訓戒於四方牧伯尤爲惓惓知成周之制九州牧長皆重訓刑之職矣

禮記王制天子使其大夫爲三監監於方伯之國國三人孔穎達疏謂使在朝之大夫往監於方伯每一州輒三人崔氏云此謂殷之方伯皆有三人以輔之佐其伯謂監所領之諸侯也周則於牧下置二伯

謹案今各道爲藩臬之佐亦稱監司攷王制所稱以大夫而監方伯之國以一國而監者三人其官品尊卑官數多少與今道員約略相合崔氏言三人輔佐方伯以監所領之諸侯明非監方伯也亦與今日各道輔佐藩臬監所領之府州規制相同惟古時未詳分職今則以事區別所掌體制稍殊然國必三人固知各有所司之事特世遠莫詳耳三監之使實爲漢唐以來分部分道命使巡察之始而道員爲諸侯之副佐是大夫爲監者固諸道之權輿也

秦

漢書百官公卿表監御史秦官掌監郡

杜佑通典秦以御史監郡謂之監御史

謹案秦罷侯置守並方伯連帥而悉去之惟以御史監

郡而不言職掌蓋猶周代大夫監之遺意耳秦制簡略無可附麗今故錄其監郡御史之制而不列於表

漢

漢書百官公卿表武帝元封五年初置部刺史掌奉詔條

察州顏師古注漢官典職儀云刺史班宣周行郡國省察治狀黜陟能否斷治冤獄以六條問事非條所問即

不省一條強宗豪右田宅踰制以強凌弱以眾暴寡二條姓聚斂為姦三條二千石不恤疑獄風厲殺人怒則任刑喜則浮賞煩擾刻暴割截黎元為百姓所疾山崩石裂譏祥譎言四條二千石選舉不平苛阿所愛蔽賢寵頑五條二千石子弟恃怙榮勢請託所監六條二千石違公下比阿附豪強通行貨賂割損正令也成帝綏和元年更名牧哀帝建平二年復為刺史元壽二年復為牧

王應麟玉海黃泰交州記曰刺者言其刺舉不法史者使

也言為天子之所使也

漢書何武列傳刺史古之方伯上所委任一州表率也

謹案漢初易秦監御史為刺史而御史不設然攷刺史行部御史為駕又六條所察有二千石子弟請託所監之文是監御史亦未盡省也刺史之職有可攷者六條之中一條以察民五條以察吏如所云田宅踰制云不奉詔書云選舉不平則如今布政使之所治也云不恤疑獄云二千石違公下比阿附豪強則如今按察使之所糾也其治有常所乘傳行部則今守巡諸道職亦兼之惟是任重秩輕名實不副後遂以州牧遞易紛紜不定且前漢之州牧雖與刺史異秩而職事亦無大殊蓋

漢時吏治專責成於郡守而刺史之所以設者亦止以督察二千石朱博稱刺史不察黃綬明不使之盡與郡國之事也其與今之兩司綜理全省體分隆而委任專者規制固有不同特其職掌所在郡國分而理之刺史總而臨之其統轄諸事有相近者故約舉於篇以溯司道諸職之所緣起而不列於表俾毋與督撫沿革相溷焉

後漢書百官志外有十二州每州刺史一人六百石本註曰武帝初置刺史十三人十二人各主一州其一州屬司隸校尉諸州常以八月巡行所部郡國錄囚徒攷殿最初歲盡詣京都奏事中興但因計吏皆有從事史假佐

通典漢置刺史乘傳周行郡國無適所治中興所治有定

處案漢舊儀云刺史有常治所與此異

或謂州府為外臺靈帝中平五年改

刺史唯置牧是時天下方亂豪傑各欲據有州郡而劉焉劉虞並自九卿出領州牧州牧之任自此重矣舊制州牧奏二千石長吏不任位者事皆先下三公三公遣掾史案驗然後黜退光武即位用法明察不復委三府故權歸舉刺之吏

謹案後漢刺史與前漢同而職任漸重黜陟官吏不經三府案驗厥後羣牧專制中原擾攘益已首啟其端矣

三國

三國魏志賈逵列傳逵為豫州刺史時天下初復州郡多

職官表卷五十二
不攝遠曰州本以御史出監諸郡以六條詔書察長吏二千石已下故其狀皆言嚴能鷹揚有督察之才不言安靜寬仁有愷悌之德也於是阿縱不如法者皆奏免之帝曰遠真御史矣布告天下當以豫州爲法

通典自魏以來庶姓爲州而無將軍者謂之單車刺史

劉昭後漢書志注晉太康初詔曰漢末四海分裂吳蜀自擅刺史內親民事外領兵馬此一時之宜爾

謹案三國刺史承後漢之積重其流遠遂分爲二使持節都督持節刺史起於魏時權如今之督撫太康詔所云者是也單車刺史職如今之司道賈逵所職者是也當時以嚴能督察爲真刺史蓋偏近於按察使之任實

因秦漢之舊制而其任則加重也

晉

晉書職官志州置刺史別駕治中從事諸曹從事等員所領中郡以上及江揚朱提郡郡各置部從事一人小郡亦置一人又有主簿門亭長錄事記室書佐諸曹佐守從事武猛從事等凡吏四十一人卒二十人諸州邊遠或有山險濱近寇賊羌夷者又置弓馬從事五十餘人徐州又置淮海涼州置河津諸州置都水從事各一人涼益置吏八十五人卒二十人荊州又置監佃督一人

玉海王隱晉書曰太康三年罷刺史將軍官刺史依漢制三年一人奏事

通典晉制刺史三年一入奏甲午詔書曰刺史銜命國之外臺其非所部而在境者刺史并糾之

謹案晉置刺史如漢制三年入奏在境并糾蓋斟酌漢制而變通之者其佐吏有武猛從事弓馬從事准海河津都水從事監佃督諸員略如今之巡海水利屯田諸職惟今日則以方面大員兼理諸政非僚佐之可得比擬故備錄史文以見其概而不列於表焉

宋齊梁陳

宋書百官志刺史每州各一人刺之為言猶參覘也寫書亦謂之刺漢制不得刺尚書事是也刺史班行六條詔書有別駕從事史治中從事史主簿西曹書佐祭酒從事史

議曹從事史部郡從事史自主簿以下置人多少各隨州舊無定制

通典宋刺史與魏同

南齊書百官志州牧刺史州朝置別駕治中議曹文學祭酒諸曹部從事史

隋書百官志梁制州刺史二千石州置別駕治中從事各一人主簿西曹議曹從事祭酒從事部傳從事文學從事各因其州之大小而置員定為十八班以班多者為貴其州二十三並列其高下選擬略視內職○陳承梁皆循其制官其庶姓為州若無將軍者謂之單車揚州刺史南徐東揚州刺史品並第三荆江南兗鄆襄雍等州刺史品並

職官表卷五十一
第四豫益廣衡等州青州領冀州北兗州北徐等州梁州
領南秦州司南梁交越桂霍寧等十五州刺史揚州別駕
中從事品並第六庶姓南徐荆江南兗郢襄雍等州別駕
中從事品並第八庶姓豫益廣衡青冀北兗北徐梁秦司
南徐等州別駕中從事揚州主簿西曹及祭酒議曹二從
事南徐州主簿西曹祭酒議曹二從事品並第九

謹案宋齊梁陳刺史之制與魏晉同其時州之分置者
漸多而刺史亦以漸眾惟其以州統郡兼理兵民不僅
專舉察之事又因其州之上下定為上中下三等州地
雖分析而日小而監司之權要與後漢無異也

北魏

魏書官氏志天賜二年制諸州置三刺史刺史用品第六
者宗室一人異姓二人比古之上中下三大夫也刺史令
長各之州縣自前功臣為州者還京師司州牧從第二品
上州刺史第三品中州刺史從第三品下州刺史第四品
司州別駕從事史司州治中從事史從第四品司州主簿
從第七品司州西曹書佐祭酒從事史第八品司州議曹
從事史司州文學從第八品

謹案魏書有三刺史而不列刺史之佐以司州諸佐攷
之則每州皆有別駕治中主簿等員可以類推亦猶漢
晉之制也

北齊

隋書百官志後齊制官多從後魏州刺史屬官有別駕從事史治中從事史州都光迎主簿主簿西曹書佐市令及史祭酒從事史部郡從事卓服從事典籤及史門下督省事都錄事及史箱錄事及史朝直刺姦記室掾曹田曹金曹租曹兵曹左戶等掾史等員上下州屬官佐史合三百九十三人上中州減上上州十人上下州減上中州十人中上州減上下州五十一人中中州減中上州十人中下州減中中州十人下上州減中下州五十人下中州減下上州十人下下州減下中州十人

通典北齊制州為上中下三等每等又有上中下之差自上上州至下下州凡九等

謹案刺史之職所以統率屬郡魏既分為三等北齊又分為九等則稱名繁碎而體制亦以漸替矣此隋代改州為郡之漸也

後周

周書盧辯傳戶三萬以上州刺史命正八戶二萬以上州刺史命正七戶一萬以上刺史命正七戶五千以上刺史命正七戶八命州長史司馬司錄命正六八命州長史司馬司錄命正五七命州長史司馬司錄命正四正八命州別駕八命州呼藥命正四正六命州長史司馬司錄命正四正七命州別駕正八命州治中正七命州呼藥命正四正八命州列曹參軍正六命州別駕正七命州治中七命州呼

藥正三命八命州列曹參軍正六命州治中正六命州呼藥

三命正七命州列曹參軍正二命七命州列曹參軍正六命

州列曹參軍正一命

謹案後周官制史文不詳茲摭錄盧辯傳所載命數以存其大概其刺史案戶之多寡分為四等蓋循後魏上中下之制而稍變通之其與北齊之三刺史又分為三等者規制不同攷七命之戶五千以上刺史尚在戶一萬五千郡守之上可知以州統郡刺史雖自有屬戶而列郡大小仍在統轄之中亦如唐宋監司既自治民并監郡縣也其屬官各員遞為等差與漢晉以來大同而小異焉

隋

隋書百官志上上州置刺史長史司馬錄事參軍事功曹戶兵等曹參軍事法曹士曹等行參軍典籤州都光迎主簿郡正主簿西曹書佐祭酒從事部郡從事倉督市令丞等員并佐史合三百二十三人上中州減上州吏屬十二人上下州減上中州十六人中上州減上下州二十九人中中州減中上州二十人中下州減中中州二十人下上州減中下州三十二人下中州減下上州十五人下下州減下中州十二人

通典隋雍州置牧餘州並置刺史亦同北齊九等之制總管刺史加使持節至開皇三年罷郡以州統縣自是刺史

之名存而職廢後雖有刺史皆太守之互名理一郡而已非舊刺史之職案魏置使持節寵奉使官之任隋氏廢郡而後刺史牧人既非使官則合罷持節之稱其時制置不以名實相副為意仍舊存之後改為太守亦復不省所以使持節之名及煬帝大業初為司隸臺大

夫一人巡察畿內其刺史十四人巡察畿外諸郡亦有六條之制與漢六條不同從事四十人副刺史巡察每年二月乘車

巡郡縣十月入奏

謹案杜佑言刺史察舉州郡至隋治人後雖有刺史皆太守之互名蓋刺史之制至隋始變然攷煬帝初尙有刺史十四人巡察畿外諸郡蓋開皇變制而大業尋復其止理一郡者乃唐代之制非隋世盡然也攷歷代刺史遞重遞輕之故皆由積漸而成漢初監郡察郡秩止

六百石自後更為州牧後漢不入奏事不隸三公至劉焉請重州牧之任魏晉因之有使持節都督持節督之名此其漸而重也至隋之總管都督唐之都督節度使為重之極焉晉武帝詔革漢季之制刺史治民悉如漢初故事自後非要州則為單車刺史治至魏齊有下州刺史下州刺史此其漸而輕也至隋始罷郡以州統縣刺史為太守互名自後遂以為知州之稱并在郡守之下為輕之極焉蓋極重則權同督撫而單州刺舉司道之職未嘗不存極輕則下並府州而採訪按察轉運提刑諸使由是興焉此列代沿革之大概故自隋以前之刺史雖其體制不盡如今之藩臬而要有藩臬之職

自唐以後之刺史則竟同今之知府及直隸州矣今歷敘前代刺史至隋而止并攷證其沿革之大概至唐以後則見於府州篇中不具列焉

唐

通典開元二十五年刊定職次著為格令設官以經之置使以緯之按察採訪等使以理州縣節度團練等使以督府軍事租庸轉運鹽鐵青苗營田等使以毓財貨其餘細務因時置使者不可悉數其轉運以下諸使無適所治廢置不常

新唐書百官志觀察使副使支使判官掌書記推官巡官衙推隨軍要籍進奏官各一人團練使副使判官推官巡

官衙推各一人防禦使副使判官推官巡官各一人觀察處置使掌察所部善惡舉大綱凡奏請皆屬於州。貞觀初遣大使十三人巡省天下有巡察安撫存撫之名神龍二年以五品以上二十人為十道巡察使按舉州縣再周而代景雲二年置十道按察使道各一人開元二年改曰十道按察採訪處置使至四年罷八年復置十道按察使秋冬巡視州縣十年又罷十七年復置十道京都兩畿按察使二十年改採訪處置使分十五道杜佑通典云治於所部之大郡天寶末又兼黜陟使乾元元年改曰觀察處置使

通典唐無州府之名而有採訪使採訪使有判官二人分判及州郡簿書支使二人分使出入職如推官一人推鞠至

職官表卷五十二
德之後改採訪使為觀察皆并領都團練使其僚屬隨時
增置分天下為四十餘道大者十餘州小者二三州各因
其山川區域為制諸道增減不恆使名沿革不一舉其職
例則皆古之刺史云

舊唐書職官志防禦團練使至德後置防禦使以治軍事
刺史兼之不賜旌節上元後改防禦使為團練守捉使又
與團練兼置防禦使名前使各有副使判官皆天寶後置
未見品秩

馬端臨文獻通攷唐肅宗乾元初置團練使守捉使大領
十州小者三五州代宗時元載當國令刺史悉帶團練大
率團練皆隸所治州歲以八月攷其高下

新唐書百官志觀察使以豐稔為上攷省刑為中攷辦稅
為下攷團練使以安民為上攷懲姦為中攷得情為下攷
防禦使以無虞為上攷清苦為中攷政成為下攷

文獻通攷唐先天二年李傑始名務先始為水陸發運使蓋使

名之起開元二十一年裴耀卿以侍中充江南淮南轉運
使而崔希逸蕭冕為副蓋副使始此天寶以韋堅充勾當
轉運使第五琦充諸色轉運使劉晏充諸路轉運使其後
韓滉杜棕杜讓能崔昭緯皆以宰相充使而諸道分置巡
院皆統於此○開元十年敕度支營田若一使專知宜同
為一額共置判官兩人○開元十一年宇文融除勾當租
庸地稅使至德元載第五琦充江淮租庸使永泰元年租

職官表卷五十二
庸使一切並停唯差判官一人巡官二人催遣○建中二
年初分置汴東西水陸運兩稅使○開元十二年宇文融
充諸色安輯戶口使

謹案唐代以刺史爲郡守而諸道置使昉於貞觀之遣
使十三人巡省天下其後爲巡察爲按察爲採訪爲觀
察使名不同其職一也觀地理志言採訪使如漢刺史
六典言漢刺史如今之十道使通典言觀察團練皆古
之刺史則諸使職掌實上承漢代刺史而與今之司道
相等惟節度使秉節專制如今之督撫耳其道爲十道
爲十五道十八道爲四十餘道以漸而分亦後日分道
之所託始也謹以今制攷之轉運租庸兩稅戶口諸使

如今之布政使其副使如今之督糧道採訪觀察如今
之按察使其副使亦如巡道團練營田如今之兵備屯
田諸道也又唐代雖以刺史爲郡守而職掌視今郡守
爲較重舊唐書所載刺史歲巡屬縣觀風俗察官吏善
惡殊尤隨即奏聞所部有更改得以便宜從事是州郡
而寓諸司之職也至如防禦團練未嘗別置各以治軍
刺史兼領之是州郡而兼各道之權也蓋唐諸史之設
隨時遷革不爲常制又多爲節度使之兼官故不得不
寄其權於郡守是亦一代制度之大略也

五季

文獻通攷唐置諸道巡院五代罷巡院始置轉運使

謹案五代官制史策不詳攷其大略諸州皆統兵事其諸使亦兼總於節度使馬端臨稱五代罷巡院可類推也

宋

宋史職官志都轉運使轉運使副使判官掌經度一路財賦歲行所部檢察儲積稽攷帳籍凡吏蠹民瘼悉條以上達及專舉刺官吏之事有軍旅之事則供餽錢糧或諸路事體當合一則置都轉運使以總之若副使若判官皆隨資之淺深稱焉其屬有主管文字幹辦官各一員文臣準備差遣武臣準備差使員多寡不一

文獻通攷藝祖懲五季之亂藩臣擅有財賦不歸王府乾

德以後置諸道轉運使以總利權開寶六年廣南平除徐澤爲判官蓋轉運判官始此兩省以上則爲都轉運使又置副使與諸路判官又置同勾當轉運事至道中詔曰天下物宜民間利病惟轉運使得以周知令更互赴闕延見詢問慶厯中皆帶按察之任六年罷之熙寧二年詔轉運使用本資序人卽充資序下一等爲權二年爲權發遣中興以來逐路都轉運使除授不常惟使副判官常置

謹案轉運使掌一路財賦並舉察官吏實與今之布政使職分相埒轉運之名雖肇於唐時然不過以爲一時之制宋則職專任重稱爲漕司終代不易名雖因而實則創也其同勾當轉運事及副使如糧儲各道主管文

字如經歷照磨幹辦官則如理問都事諸職也

宋史職官志提點刑獄公事掌察所部之獄訟而平其曲直所至審問囚徒詳覆案牘凡禁繫淹延而不決盜賊逋竄而不獲皆劾以聞及舉刺官吏之事舊制參用武臣熙寧初罷之紹聖初以提刑兼坑冶事紹興初兩浙路以封疆闊遠差提刑二員淮南東路罷提刑令提舉茶鹽官兼領蓋因事之繁簡而損益焉乾道八年用臣僚言諸路經總制錢并委提點刑獄官督責嘉定十五年廣西提刑分上下半年就鬱林州與靜江府兩處置司其屬有檢法官幹辦官

文獻通攷宋太祖淳化二年以司門員外郎董循等一十

一人分充諸路轉運司提點刑獄四年省真宗景德四年謂先帝常選朝臣諸路提點刑獄遂復置之不隸轉運別爲一司稍重其權矣當時約束日所至專察囚禁詳審案牘州縣不得迎送聚會所部每旬具繫囚犯由訊鞠次第申報當檢舉催督在繫淹久者卽馳往案問出入人罪者移牒勘覆劾官吏以聞諸色詞狀逐州斷遣不當已經轉運官披斷未允者並收接施行官吏貪濁弛慢者具名以聞敢有庇匿並當加罪仍借緋紫以三年爲任增給緡錢如轉運使之數天禧四年加勸農使俄改提點刑獄勸農使十年復置提點京畿刑獄掌察所部疑畱獄訟勸課農桑而按其官吏之不法別其廉吏以達於朝元豐因之

王海慶厯三年詔轉運使皆領按察使提刑不帶使名亦
準此歲具官吏能否以聞○轉運使副卽漢刺史唐觀察
使之職

謹案宋監司以轉運及提刑爲最重提刑實爲今按察
司之職卽所謂憲司也其始由轉運使兼管後遂專遣
朝臣充之其逐州斷遣經轉運披斷未允者並收接施
行亦可見其權之重矣旣而以提刑兼勸農並督責諸
路總制錢及兼提舉諸事蓋所職以刑獄爲主而地方
重務例得兼掌亦如今藩臬各司財賦刑名之事而地
方重事會議舉行二司實相爲聯係也提刑無副官其
檢法官幹辦官如今知事及司獄之類

宋史職官志提舉常平司掌常平義倉免役市易坊場河
渡水利之法視歲之豐歉而爲之斂散以惠農民仍專舉
刺官吏之事熙寧初先遣官提舉河北陝西路常平未幾
諸路悉置提舉官元祐初罷之併其職於提點刑獄司紹
興初復置元符以後因之

文獻通攷提舉卽漢耿壽昌常平之任也自李惲制平糴
之法漢人因之則謂之常平焉然漢人特置倉而猶領之
於大司農也宋朝淳化中建常平倉景祐元年令轉運司
舉所部官專領之然猶隸漕臣熙寧遣使提領此蓋提舉
常平之所始也九年府界畿內亦專置提舉常平倉一員
不令司農丞兼領提舉常平司操常平斂散之法申嚴免

職官表卷五十二
三十一
役之政令治荒修廢賑民艱阨則隸提舉司歲察所部廉能而保任之若疲軟或犯法則隨其職事劾奏○提舉茶鹽司掌摘山煮海之利以佐國用○都大提舉茶馬司掌權茶之利以佐邦用凡市馬於四夷率以茶易之○提舉三白渠公事掌潞泄三白渠以給關中灌溉之利

謹案宋職官之近於布政使者轉運而外有提舉諸官如常平倉庫固今藩司之專掌也常平提舉其始隸於漕臣其後亦或兼於憲臣領倉而兼以察吏且并掌役市坊場水利之法他如茶馬三白渠諸提舉與今日之道員佐司分職者實為相當云

宋史職官志承宣使觀察使無定員政和中詔承宣觀察使仍不帶持節等防禦使團練使無定員

文獻通攷宋朝治唐制置諸州觀察使凡諸衛將軍及使

遙領者其資品並止本官敘防禦團練使祥符中詔觀察

使並帶刺史翰林學士陳彭年檢討唐以來故事觀察使並令帶刺史詔自今除觀察使可兼領之

謹案馬端臨云觀察團練使在唐為監司至宋則監司

自有以名其官謂轉運而觀察諸使皆無職任蓋止為

武臣及刺史所帶官名而非唐之舊矣茲故錄其沿革之概而不著於表

宋史職官志幕職官簽書判官廳公事兩使防團軍事推判官觀察支使掌裨贊郡政總理諸案文移諸曹官舊制錄事參軍掌州院庶務糾諸曹稽違戶曹參軍掌戶籍賦

職官表卷五十二
三
稅倉庫受納司法參軍掌議法斷刑司理參軍掌訟獄勘鞫之事

文獻通攷宋朝沿五代之制兩司置判官推官各一人餘州置判官各一人政和初自判官以至諸曹改爲士戶儀兵刑工曹掾建炎復舊制焉

謹案宋代轉運使提點刑獄皆以朝臣充無定品秩其觀察諸使則有定秩而實無專官卽佐屬之判官推官皆係郡職而空帶諸使之銜未免名實不相符也今以非轉運提刑所屬不列於表

遼

遼史百官志南面官僚節度觀察防禦團練刺史咸在方

州如唐制也○觀察使職名總目某州軍觀察使某州軍觀察副使某州軍觀察判官王鼎清寧五年爲易州觀察判官○團練使司職名總目某州團練使某州團練副使某州團練判官○南面分司官平理庶務採撫民隱漢唐以來賢主以爲恤民之令典官不常設有詔則選才望官爲之○分使諸道滯獄使聖宗統和九年命邢抱朴等五員又命馬守瑛等三員分使諸道滯獄○按察諸道刑獄使開泰五年遣劉涇等分路按察刑獄○採訪使太宗會同三年命珠格楞蒙古語軟也原作於骨鄰今改正爲採訪使○南面財賦官諸錢帛司職名總目某州錢帛都點檢大公鼎爲長春州錢帛都提點○轉運司職名總目某轉運使某轉運

副使同知某轉運使某轉運判官

王圻續文獻通攷遼南面有山西路都轉運使司有奉聖州蔚州應州朔州保州西山各處轉運使司官有轉運使轉運副使同知轉運使等員○遼南面觀察使司中京道上京道東京道皆設觀察使司○遼南面有按察諸道刑獄使有分使諸道滯獄使官不常設有詔則選才望官充之

謹案遼南面監司與宋制相近錢帛轉運爲財賦官分使滯獄按察刑獄爲刑名官其大較也然按察諸使因事出差不常設蓋如漢繡衣使者之比而觀察使常設則今日之按察使實其職也王應麟玉海云宋提刑卽唐觀察之職王圻續通攷亦云明設按察卽觀察使之職參互以觀則臬司之源流略可睹矣

金

金史百官志都轉運司使正三品掌稅賦錢帛倉庫出納權衡度量之制同知從四品副使正五品都勾判官從六品紀綱眾務分判勾案戶籍判官二員從六品專管拘收徵剋等事度支判官二員從六品掌勾判分判度支案事鹽鐵判官一員從六品都孔目官二員勾稽文牘知法二員從八品

續文獻通攷金初設轉運司後詔中外惟都轉運依舊專管錢穀自餘諸路轉運皆兼於按察其都轉運使有正副

使等員

金史百官志按察司本提刑司承安三年以上京東京等提刑司併為一提刑使兼宣撫使勸農採訪事為官稱副使判官以兼宣撫副使判官為名承安四年改按察司正三品掌審察刑獄照刷案牘糾察濫官汙吏豪滑之人兼勸農桑與副使簽事更出巡案副使正四品兼勸農事簽按察司事正五品判官二員從六品知事正八品泰和八年以轉運司權輕州縣不畏不能規措錢穀遂詔中都都轉運依舊專管錢穀事自餘諸路按察使並兼轉運司副使兼同知簽按察並兼轉運副添按察判官一員為從六品添知事一員知法二員從八品

續文獻通考金觀察使兼於節度使團練使金不置

謹案金按察初名提刑實兼宣撫勸農之職其後又兼轉運使其佐屬亦兼轉運副使是按察之權在轉運之上此制之小異於宋代者也唐有按察使偶置而旋罷之今按察之名實自金始云

元

元史百官志行中書省每省參知政事二員從二品○宣慰司掌軍民之務分道以總郡縣行省有政令則布於下郡縣有請則為達於省其在遠服又有招討安撫宣撫等使品秩員數各有差等宣慰使司秩從二品每司宣慰使二員從二品同知一員從三品副使一員正四品經歷一

員從六品都事一員從七品照磨兼架閣勾管一員正九品凡六道○團練安撫勸農使司至正十八年九月置奉元延安等處團練安撫勸農使司於耀州鞏昌等處團練安撫勸農使司於邠州各設參謀一員每道置使二人同知副使各一人檢督六人經歷知事照磨各一人屯田使司至正十五年十二月置軍民屯田使司於沛縣正三品謹案元立行中書省其官自丞相平章左右丞而下有參知政事二員明初亦設之後罷行改參知政事為左右承宣布政使司是參知政事實布政使所自來也至宣慰司之職布行省之政令於下而達郡縣之請於上亦如今兩司上承督撫下達府縣故並列焉團練安撫

勸農以三使而併為一官如今各道之兼兵備屯田之制也至如招討宣撫設於邊郡與藩職少異元史又有奉使宣撫詢民疾苦體察官吏而黜陟之則偶一遣使非設官常制故不著於篇轉運使司元代專以理鹺政與宋制異已別見鹽政篇茲不復錄

〔元史百官志〕肅政廉訪使國初立提刑按察司至元六年兼勸農事二十八人改按察司為肅政廉訪司其後遂定為二十二道每道廉訪使二員正三品副使二員正四品簽事四員兩廣海南止二員正五品經歷一員從七品知事一員正八品照磨兼管勾一員正九品○內道八隸御史臺山東西道濟南路置司河東山西道冀寧路置司

燕南河北道真定路置司江北河南道汴梁路置司山南
江北道中興路置司淮西江北道廬州路置司江北淮東
道揚州路置司山北遼東道大寧路置司江南十道隸江
南行臺江東建康道寧國路置司江西湖東道龍興路置
司江南浙西道杭州路置司浙東海右道婺州路置司江
南湖北道武昌路置司嶺北湖南道天臨路置司嶺南廣
西道靜江府置司海北廣東道廣州路置司海北海南道
雷州路置司福建閩海道福州路置司陝西四道隸陝西
行臺陝西漢中道鳳翔府置司河西隴北道甘州路置司
西蜀四川道成都路置司雲南諸路道中慶路置司

謹案王圻續通攷曰廉訪之職與臺察相表裏按治帥

府漕司軍民司屬照刷諸司文卷責違慢官吏此殆如
漢制之司隸校尉無所不糾其職重矣蓋金元之制提
刑皆在布政之上兩史所載班班可攷史又言按察司
巡行郡縣除使二員畱同副使以下每歲二月分按十
月還司則視今之巡道其立法之意正復同焉

明

明史職官志承宣布政使司左右布政使各一人從二品左
右參政從三品左右參議無定員從四品參政參議因事添設
各省不等經歷司經歷一人從六品都事一人從七品照磨所
照磨一人從八品檢校一人從九品理問所理問一人從六品副
理問一人從七品提控案牘一人司獄司司獄從九品庫大使

一人從九品副使一人倉大使一人從九品副使一人雜造局

軍器局寶泉局織染局各大使一人從九品副使一人所轄衙門

各省不同布政使掌一省之政參政參議分守各道及派管糧

儲屯田清軍驛傳水利撫民等事併分司協掌京畿兩京不設

布政無參政參議副使僉事故於附近布政分司帶管經歷都事典受發文移照磨

檢校典勘理卷宗理問典刑名初太祖略定地方即置行

省其官自平章政事以下大略與中書省同洪武九年罷

行省改參知政事為左右承宣布政使司宣德三年除兩

京外定為十三布政使初置藩司與六部均重布政使入

為尙書侍郎副都御史每出為布政使宣德正統間猶然

自後無之。提刑按察使司按察使一人正三品副使正四品

僉事無定員正五品經歷司經歷一人正七品知事一人正八品

照磨所照磨一人正九品檢校一人從九品司獄司司獄一人

從九品按察使掌一省刑名按劾之事副使簽事分道巡察

其兵備提學撫民巡海清軍驛傳水利屯田招練監軍各

專事置併分員巡備京畿明初置提刑按察司吳元年置

各道按察司十五年置天下府州縣按察分司以儒士王

存忠等五百三十一人為試僉事人按二縣凡官吏賢否

軍民利病皆得廉問糾舉十六年罷二十九年改置按察

分司為四十一道宣德五年除兩京不置共為十三按察

司布政使參政參議分司諸道督糧道十三布政司各一員督冊道

江西陝西分守道浙江杭嘉湖道寧紹台道金衢嚴道溫

等間設

處道江西南瑞道湖東道湖西道饒南九江道贛南道山東濟南道東兗道海右道山西冀寧道河東道冀北道冀南道陝西關內道關西道西寧道關南道河西道隴右道河南大梁道河南道汝南道河北道湖廣武昌道下荆南道上荆南道兼兵備荆西道兼兵備上湖南道下湖南道上江防道下江防道福建興泉道福寧道漳南道建南道汀漳道廣東嶺東道嶺西道羅定道嶺北道嶺南道四川川西道川北道上下川東道上川南道下川南道廣西桂平道蒼梧道左江道右江道貴州安平道貴寧道新鎮道思仁道雲南臨安道騰衝道瀾滄道以上或參政或參議按察司副使命事分司諸道提督學道清軍道驛傳道十三布政司俱各一員惟湖廣提學

二員浙江山西陝西福建廣西貴州清軍兼驛傳江西右布政使清軍分巡道浙江杭嚴道

寧紹道嘉湖道金衢道江西饒南道九江道湖西道南昌道湖東道嶺北道山東兗州道濟寧道青州海防道濟南道海右道海道登萊道遼海道山西冀寧道冀南道雁門道陝西關內道關西道隴右道河西道西寧道河南大梁道汝南道河南道河北道湖廣武昌道荆西道上荆南道下荆南道湖北道上湖南道下湖南道沅靖道福建巡海道兼理糧儲福寧道興泉道建南道武平道漳南道建寧道海道汀漳道廣東嶺東道嶺西道嶺南道海北道海南道四川上東道下東道川西道川北道下川南道上川南道廣西府江兵巡道桂林巡道蒼梧兵巡道左江兵巡道右江

兵巡道貴州貴寧道思石道都清道兼兵雲南安普道臨

沅道洱海道金滄道整飭兵備道浙江寧紹道嘉興道溫

處道台海道江西南瑞道廣建道山東臨清道武德道曹

濮道沂州道遼東道山西雁北道大同道二陽和道潞安

道岢嵐道陝西肅州道固原道臨洮道洮岷道靖遠道榆

林中路道榆林東路道寧夏河西道寧夏河東兵糧道莊

浪道濮羌道潼關道湖廣辰沅道河南睢東道福建兵備

道巡海道廣東南韶道南雄道四川松潘道威茂道建昌

道重夔道安綿道敘瀘道廣西分巡道兼兵貴州威清道

畢節道雲南曲靖道其外又有協堂道副使河南水利道

浙屯田道江西河南四川三省兼管河道河南鹽法道撫治道陝

撫治商洛道湖廣監軍道因事不招練道山東其北直隸

之道寄銜於山東者則為密雲道大名道天津道霸州道

寄銜於山西者則為易州道口北道昌平道井陘道薊州

永平等道南直隸之道寄銜於山東者太倉道潁州道徐

州道寄銜於浙江江西湖廣者蘇松道漕儲道常鎮道廬

鳳道徽寧池太道淮揚道按明初制恐守令貪鄙不法故

於直隸府州縣設巡按御史各布政司所屬設試僉事已

罷試僉事改按察分司四十一道此分巡之始也分守起

於永樂間每令方面巡視民瘼後遂定右參政右參議分

守各屬府州縣兵道之設仿自洪熙間以武臣疏於文墨

遣參政副使沈固劉紹等往各總兵處整理文書商榷機

密未嘗身領軍務也至宏治中本兵馬文升慮武職不修
議增副僉一員從之自是兵備之員盈天下

續文獻通攷團練使之職明設分巡兵備道以統之兩京
不設布按二使故督學以御史後置守巡諸員無所屬則
寄銜於隣近省布按司官

謹案歷代監司之職至唐宋而始分至前明而始定然
攷明代經畫之大端尙多可議如直隸近護畿服爲萬
國之法式藩臬不設何以敷治法而作觀瞻直省中之
疆宇闊遠事務殷繁者限十三司難免鞭長不及之患
至如提學重職而偏隸臬司河務鉅工而向乏專掌兩
直之寄銜他省亦參錯而不一此其制之未善者也至

於司道銓授之法其初尙特簡後如洪武間潘原明之

爲雲南布政使見獻徵錄儒士王存忠等之試按察司僉事

見明史猶存振厲之意至成化丙戌以各省布政二司正

貳官缺員數多始命部院各舉所知仍命銓部內閣從

公酌量定以職事見獻徵錄自是以後推用惟委之吏部往

往不能得人或以需次較久者爲之多衰贖不稱職左

右二人又每以意見不同互相掣肘道員則尤多兼領

職業不專縱弛之習日甚而吏治不可復問矣我

朝初循舊制嗣改左右布政使爲一人以專其職任直隸

則扞設藩臬江南湖廣陝西分建二省而江寧蘇州又

各設布政使一員以著因地制宜之法優道員之品秩

